

S T E N O G R A M

**21. RADNE SJEDNICE SKUPŠTINE KANTONA SARAJEVO
ODRŽANE U UTORAK, 25.02.2020. GODINE
SA POČETKOM RADA U 10,00 SATI**

Predsjedavajući Mirza Čelik (u daljnjem tekstu predsjedavajući):

Otvaram 21. Radnu sjednicu Skupštine Kantona Sarajevo.

Pozdravljam uvažene kolege i kolegice zastupnike, članove Vlade i uvažene goste, kao i predstavnike medija koji prate rad današnje sjednice.

Nadam se da će cijenjeni gledaoci Televizije Kantona Sarajevo sa pažnjom pratiti rad današnje Skupštine, te im upućujem pozdrave, a svima nama želim uspješan rad i ugodnu radnu atmosferu.

Prema evidenciji Službe, sjednici prisustvuje 30 zastupnika, što je dovoljan broj za punovažan rad i odlučivanje.

Izostanak sa ove sjednice nije niko opravdao.

Prije nego što pređemo na utvrđivanje današnjeg dnevnog reda obavještavam vas da je 05.02.2020 godine održan sastanak rukovodstva Skupštine, te da je izvršena zamjena u rukovodstvu. Rukovodstvo je jednoglasno za predsjedavajućeg Skupštine izabralo Čelik Mirzu, te su dogovorili daljnji poredak zamjenika i to: Smiljana Viteškić, Vitor Handžić, Danijela Kristić.

Zapisnik sa sastanka, kao i Odluka o imenovanju predsjedavajućeg dostavljena je zastupnicima putem e-maila dana 05.02.2020.godine.

Također vas obavještavam da je Ustavni sud FBiH Skupštini Kantona Sarajevo dostavio Mišljenje broj: U-3/20 vezano za Odluku o izboru predsjedavajućeg Skupštine Kantona Sarajevo objavljenje u „Službenim novinama Kantona Sarajevo” broj 52/19.

Mišljenje Ustavnog suda je dostavljeno zastupnicima putem e-maila dana 24.02.2020.godine.

Dnevni red 21. sjednice Skupštine Kantona Sarajevo utvrdio je Kolegij Skupštine na sjednici održanoj 12.02.2019 godine

Na osnovu člana 73. Poslovnika Skupštine Kantona Sarajevo, Kolegij Skupštine Kantona Sarajevo dana 18.02.2020. godine, prihvatio je da se Prijedlog dnevnog reda 21. radne sjednice, dopuni sa sljedećom tačkom :

1. Prijedlog odluke o izmjeni Poslovnika Skupštine Kantona Sarajevo (razmatraće se kao tačka 5.)

PRELAZIMO NA UTVRĐIVANJE DNEVNOG REDA DANAŠNJE SJEDNICE.

Na osnovu naprijed navedenog, dnevni red današnje sjednice glasi:

1. Poslanička/zastupnička pitanja, inicijative i odgovori;
2.
 - a) Informacija o realizaciji mjera za sanaciju i reorganizaciju KJKP „GRAS“ d.o.o. Sarajevo;
 - b) Informacija o zagađenju zraka u Kantonu Sarajevo;
3. Prijedlog odluke o izmjeni Odluke o imenovanju Komisije za izbor i imenovanja i administrativna pitanja Skupštine Kantona Sarajevo;
4. Prijedlog odluke o razrješenju dužnosti zamjenika pravobranioca Pravobranilaštva Kantona Sarajevo.
5. Prijedlog odluke o izmjeni Poslovnika Skupštine Kantona Sarajevo.

MOLIM ZASTUPNIKE DA SE IZJASNE O PREDLOŽENOM DNEVNOM REDU.
Otvaram glasanje. Zahvaljujem. Rezultate.
ZA JE GLASALO 35 ZASTUPNIKA, SUZDRŽANIH I PROTIV NIJE BILO.
KONSTATUJEM DA JE SKUPŠTINA USVOJILA DNEVNI RED KAKO JE
PREDLOŽENO

Prije nego što pređemo na realizaciju prve tačke dnevnog reda obavezni smo da razmatramo Zapisnike sa stenogramima sa 15, 16, 17, 18 i 19. Radne sjednice, koji su Vam dostavljeni uz poziv za sjednicu.

Ima li primjedbi? Obzirom da nema,

a) Molim vas da se izjasnite o Zapisniku sa 15. Radne sjednice Skupštine Kantona Sarajevo.
Otvaramo glasanje. Zaključujemo glasanje.
ZA JE GLASALO 35 ZASTUPNIKA, PROTIV I SUZDRŽANIH NIJE BILO.
Konstatujem da je Skupština potvrdila Zapisnik sa 15. Radne sjednice Skupštine Kantona Sarajevo održane 19.11.2019. godine.

b) Molim vas da se izjasnite o Zapisniku sa 16. Radne sjednice Skupštine Kantona Sarajevo.
Otvaram glasanje. Zaključujem glasanje.
ZA JE GLASALO 34 ZASTUPNIKA, PROTIV I SUZDRŽANIH NIJE BILO.
Konstatujem da je Skupština potvrdila Zapisnik sa 16. Radne sjednice Skupštine Kantona Sarajevo održane 11.12.2019. godine.

c) Molim vas da se izjasnite o Zapisniku sa 17. Radne sjednice Skupštine Kantona Sarajevo.
Otvaram glasanje. Zaključujem glasanje.
ZA JE GLASALO 33 ZASTUPNIKA, PROTIV I SUZDRŽANIH NIJE BILO.
Konstatujem da je Skupština potvrdila Zapisnik sa 17. Radne sjednice Skupštine Kantona Sarajevo održane 26.12.2019. godine.

d) Molim vas da se izjasnite o Zapisniku sa 18. Radne sjednice Skupštine Kantona Sarajevo.
Otvaram glasanje. Zatvaram glasanje.
ZA JE GLASALO 35 ZASTUPNIKA, PROTIV I SUZDRŽANIH NIJE BILO.
Konstatujem da je Skupština potvrdila Zapisnik sa 18. Radne sjednice Skupštine Kantona Sarajevo održane 16.01. i 23.01.2020. godine.

e) Molim vas da se izjasnite o Zapisniku sa 19. Radne sjednice Skupštine Kantona Sarajevo.
Otvaram glasanje. Zaključujem glasanje.
ZA JE GLASALO 35 ZASTUPNIKA, PROTIV I SUZDRŽANIH NIJE BILO.
Konstatujem da je Skupština potvrdila Zapisnik sa 19. Radne sjednice Skupštine Kantona Sarajevo održane 08.01, 16.01. i 23.01.2020. godine godine.

Prelazimo na prvu tačku dnevnog reda. Sada je tačno sati 10,25.

AD – 1.

POSLANIČKA/ZASTUPNIČKA PITANJA, INICIJATIVE I ODGOVORI
Kolegica Junuzović- Kaljić Amra se prava javila, izvolite.

Poslanik/zastupnik Amra Junuzović Kaljić:

Hvala predsjedavajući. Koristim priliku da pozdravim sve kolege i kolegice i gledateljstvo Kantona Sarajevo. Dakle ja ustvari samo želim da pitam, obzirom da sam ovu inicijativu, pitanje postavila septembra 2019 godine, odnosi praktički na finansiranje doktorskih

disertacija, na tu inicijativu na pitanje nisam dobila odgovor, a smatram ga veoma važnim jer praktički finansiranje nauke i istraživačkog rada u BIH je na veoma niskom nivou. I onda negdje ovo pitanje uskraćivanja sufinansiranja doktoranata koji su na UNSI doktorirali nakon juna 2018, u 2019 uskraćena je podrška Ministarstva. Time su oni stavljeni u neravnopravan položaj u odnosu na kolege koji su odbranili doktorat do juna 2018 godine. Dakle evo ponovno samo podsjećam na ovo moje pitanje, odnosno inicijativu na koju nije odgovoreno. Hvala.

Poslanik/zastupnik Zvonko Marić:

Zahvaljujem predsjedavajući. Dame i gospodo, drugarice i drugovi, poštovani građani koji na bilo koji način pratite rad ovog doma. Ja imam dva pitanja. Budući da smo suočeni ovih dana sa epidemijom Korona virusa volio bih da resorna ministrica ili direktorica Zavoda za javno zdravstvo da odgovor građanima, budući da smo mi kao zastupnici imali Kolegij maloprije, i to vanrednu sjednicu Kolegija da nam kaže u kojoj fazi, budući da ima i elemenata panike zbog svega što se dešava u Italiji posebice a onda i Iranu koji su vrlo interesantni za nas, ali i Kini i Južnoj Koreji iz prostog razloga što dolaze brojni turisti, ima tu propusta. Mora biti multidisciplinarni pristup i puno segmenata ovoga društva treba se uključiti u rješavanje ovakvog problema da nam kažu koje upute su stožeri, krizni štabovi, kako god hoćete, poduzeli da se građani na neki način ponašaju malo drugačije jer je neka situacija koja podsjeća i asocira na vanrednu. Osim činjenice da je pojačana higijena, kako i na koji način se trebaju ponašati. Turisti koji žele posjetiti Italiju da li stupiti u kontakt sa tim turističkim agencijama, da li će biti odgođena ili ne, i na koncu interesira me posebice izolatorij. Puno je toga, u Mostaru je utemeljen u okviru Kliničkog centra, gdje su bolesnici naravno. Mislim da je to neprimjereno i šta se radi na tom planu? Dakle jednu informaciju budući da nam danas nije uvrštena ta tačka dnevnog reda a nalaže njena vanrednost da se to desi.

Drugo moje pitanje, može se pretvoriti u inicijativu, budući da smo u prošlom mandatu a i u prethodnih godinu dana jako puno obmanjivali predstavnike nevladinih organizacija koje se bave problemima djece sa poteškoćama. Za ovu Vladu a i za svaku drugu da napokon počne to da se rješava sistemski i da se u budžetu koji treba biti usvojen nađe ova stavka koja će riješiti i sve one potrebe u smislu kadrova a to su prije svega psiholozi, asistenti u nastavi, logopedi i da ne nabrajam sve ono što smo im obećali, čak i kroz skupštinsku odluku a na tom planu se nije ništa uradilo osim što su tako reći u rasulu zbog činjenice, a toliki broj djece okupljaju i pokušavaju da im pomognu, da prestanemo da ih obmanjujemo i da pružimo konkretnu pomoć ili neko prelazno rješenje ka sistemskom rješavanju. Da ne pominjem više. Završavam ovom rečenicom. I Vladimir Nazor gdje se čak pominje i diskriminacija u medijima. Dakle, potpuno zapušten segment društva koji je vrlo osjetljiv i neprimjereno je od nas da se tako odnosimo prema tome. Hvala vam lijepo.

Poslanik/zastupnik Amra Hasagić.,

Zahvaljujem predsjedavajući. Pozdravljam sve prisutne i sve one koji na bilo koji način prate rad današnje sjednice. Ja bih imala jedno pitanje i pismeni odgovor bih molila. Na 14. radnoj sjednici ja sam uputila jednu inicijativu prema Ministarstvu saobraćaja da se izradi pravilnik kojim se definiše postupak i način uklanjanja oštećenih i dotrajalih i neregistrovanih vozila. Da li se pristupilo izradi tog pravilnika. Hvala vam.

Poslanik/zastupnik Smiljana Viteškić:

Zahvaljujem predsjedavajući. Dobar dan svima. Ja podnosimo inicijativu da se uspostavi videonadzora na dječjim igralištima i sportskim terenima na području općine Ilidža.

Obrazloženje:

Svjedoci smo učestalih vandalskih dešavanja na dječjim igralištima, parkovima te na otvorenim sportskim terenima, gdje su djeca izložena čestim napadima, neprimjerenim

ponašanjima od strane pojedinaca, kao i sve češćim oštećenjima mobilijara na takvim mjestima.

Kako bi se spriječila takve pojave, identifikovali počinioci te osigurala bezbjednost kako djece tako i ostalih korisnika igrališta, parkova i terena, tražimo da se resorno ministarstvo uključi u saradnji sa školama na području općine Ilidža. Hvala.

Poslanik/zastupnik Samir Suljević.,

Hvala predsjedavajući. Pozdravljam sve prisutne kao i gledaoce koji prate današnji rad Skupštine. Imam jednu inicijativu koja mi je da vam kažem iskreno inicirana zadnjim događajima oko nosioca javnih funkcija u Kantonu Sarajevo. Naime, veći broj nosioca javnih funkcija u Kantonu Sarajevo općinskih vijećnika, članova upravnih i nadzornih odbora, zaprimio prekršajni nalog od strane Ureda za borbu protiv korupcije i upravljanja kvalitetom Kantona Sarajevo. U kojem stoji da nosioci javnih funkcija nisu u zadatom roku od 01.01. do 31.01.2020 godine prijavili imovinu u skladu sa članom 10. Zakona o prijavljivanju i postupku provjere podataka imovine. Kako ukupne godišnje prihode nije moguće prijaviti u ovom vremenskom periodu iz prostog razloga što se godišnji izvještaji o ukupnim isplaćenim plaćama i drugim ličnim primanjima dobivaju do kraja februara te su mnogi primorani dati proizvoljne ili približne podatke što je normalno kažnjivo članom 21 stav Zakona o prijavljivanju i postupku provjere podataka o imovini, podnosim ovu inicijativu da se inicira usklađivanje ovog Zakona sa godišnjom prijavom ukupno isplaćenih plaća i drugih primanja odnosno da u članu 10. umjesto 01.01. - 31.01.2020 stoji 01.03 – 31.03. 2020. godine.

Drugo je zastupničko pitanje, upućeno je vama predsjedavajući, a u svakom slučaju evo tražim da li je moguće da mi Ministarstvo prostornog uređenja, građenja i zaštite okoliša Kantona Sarajevo da mi dostavi zaključke sa skupa na temu „Provođenje mjera zaštite od požara u objektima kolektivnog stanovanja na području Kantona Sarajevo” održanog 10.05.2018 u prostorijama Privredne komore FBiH.

I posljednje ima prijedlog zaključaka o kojima želim da se zastupnici izjasne.

Na osnovu članova 117 i 120 Poslovnika Skupštine Kantona Sarajevo predlažem da Skupština Kantona Sarajevo donese sljedeće zaključke:

1. Obavezuje se MUP da u suradnji sa Ministarstvom prostornog uređenja, građenja i zaštite okoliša putem upravnika zgrada obavijesti etažne vlasnike o njihovoj zakonskoj obavezi nabavke protupožarne opreme shodno članu 25. stav 1) Zakona o zaštiti od požara i vatrogastvu.
2. Obavezuju se upravnici koji obavljaju poslove upravljanja i održavanja zgrada da podatke o stanju protiv-požarne opreme dostavljaju Civilnoj zaštiti Kantona Sarajevo koja ima zadatak da ih objedinjava i obrađuje.
3. Obavezuje se MUP, Ministarstvo prostornog uređenja građenja i zaštite okoliša civilna zaštita Kantona Sarajevo, i upravnici koji obavljaju poslove, upravljanja i održavanja zgrada na području Kantona Sarajevo da Skupštinu Kantona Sarajevo obavijeste o sprovedi ovih zaključaka do 30.06-2020 godine ili prije ukoliko je to u mogućnosti.

Hvala vam.

Predsjedavajući:

Hvala uvaženom kolegi Suljeviću. Morate nam pismeno dostaviti svakako kako bi se očitovali. Riječ ima uvaženi zastupnik Marjanović Damir.

Poslanik/zastupnik Damir Marjanović:

Zahvaljujem predsjedavajući. Pozdravljam kolegice i kolege i sve one koji prate Skupštinu, pa par kratkih pitanja. Evo prošlo je četiri mjeseca vezano za tematsku sjednicu o reformi obrazovanja. Jedan od zaključaka je bilo da će se oformiti posebno ekspertsko tijelo koje će u koordinaciji sa Ministarstvom za obrazovanje i nauku i mlade Kantona Sarajevo rukovoditi

reformskim procesima u obrazovnom sistemu Kantona Sarajevo. Pretpostavljam da u svim ovim zbivanjima u Kantonu Sarajevo i tranzicijama i promjenama većina i manjima, itd, malo zaboravljeno i da vjerovatno to tijelo koliko znam jeste odobreno od Vlade ali nikada se nije sastalo. Međutim obaveza informiranja dokle se došlo sa realizacijom zaključaka i dalje ostaje, tako da predlažem da za sljedeću sjednicu koja nam je već vrlo brzo obavezno uvrstimo tačku dnevnog reda gdje ćemo zamoliti kolege iz Ministarstva, pošto znam da se radi tamo na nekim izmjenama Zakona i mnogim drugim stvarima da nas u okviru posebne tačke informiraju o tome šta je urađeno. Podsjećam još jednom, tijelo imaće obavezu kvartalnog informisanja. Prošlo je već četiri mjeseca i vrijeme je da malo se informiramo šta je urađeno, a šta nije.

Druga stvar isto pitanje ide prema Ministarstvu obrazovanja, nauku i mlade Kantona Sarajevo prema informacijama koje imam, UNSA ima određenih problema i zastoja, prije ću reći u rješavanju radno pravnog statusa određenih osoba na više fakulteta i ustanova, pa ću zamoliti u pismenoj formi da mi se dostave informacije vezano za taj proces. Vjerovatno je povezan sa privremenim finansiranjem ili ne, ali ću zamoliti Ministarstvo obrazovanja ako treba i Ministarstvo finansija da se očituje po tom pitanju.

Treća stvar je, koliko je meni poznato s tim što ću se ograditi, možda nisam dovoljno dobro upoznat, da laboratorija za genetičko testiranje na KCUS ima tzv vrijednost sigurnosti tzv 2+ što je prema standardima Svjetske zdravstvene organizacije dostatno za bazična i osnovna testiranja mikroorganizama i virusa, u ovom slučaju Korona virusa. Ono što je stvarno sugerirano i što se već godinama sugerira jeste da se uloži u tu laboratoriju da ne budemo samo u tom momentu osuđeni da neka bazična testiranja radimo neke bazične detekcije, nego da budemo malo i pripremljeniji za Korona viruse i sve one viruse koji nam dolaze. S tim u vezi me zanima da dobijem informaciju o statusu te laboratorije, šta se planira u budućnosti, da li da se razvija ta laboratorija, da se taj nivo sigurnosti podiže na već nego što je 2+-. a posebno me zanima mogućnost nekog načina dislociranja ili pozicioniranja te laboratorije, recimo, koliko imam informaciju na Podhrastovima gdje postoje već uvjeti da se dobiju viši nivoi sigurnosti. Na taj način bi bili pripremljeniji za sve moguća genetička testiranja, kojih će, čini mi se, sa razvojem ovoga svijeta i svega onoga što se dešava, biti jako bitna. Ja vam se zahvaljujem.

Predsjedavajući:

Zahvaljujem uvaženom zastupniku Marjanoviću. Sljedeći ima riječ Haris Pleho. Obzirom da ga nema u sali, isključio se. Uvažena zastupnica Vildana Bešlija.

Poslanik/zastupnik Vildana Bešlija:

Hvala predsjedavajući. Pozdravljam sve koji nas prate. Ja bih imala pitanja Zavodu za izgradnju Kantona Sarajevo. Zašto Zašto Zavod, u skladu sa ranijom praksom, u Prijedlogu odluke o davanju saglasnosti za potpisivanje ugovora o kupoprodaji zemljišta putem neposredne pogodbe između Zavoda za izgradnju Kantona Sarajevo i Imamović Elvira radi oblikovanja građevinske parcele (u nastavku teksta: Prijedlog), koja je bio na dnevnom redu 15. redovne sjednice održane 19.11.2019. godine, nije naveo da je objedinjavanje građevinske parcele potrebno radi izgradnje nebodera?

Zašto su najvažniji elementi Prijedloga, ime investitora i plan za izgradnju poslovnog objekta visoke spratnosti, izostavljeni iz Prijedloga? Naime, Materijali koji su dostavljeni tada na 15. redovnoj sjednici sadržavali su ovaj prijedlog. U samom naslovu, ali i cjelokupnom tekstu se ne navode se ključni elementi, zahvaljujući kojima bi bilo jasno da se radi o prodaji parcele, na kojoj će biti izgrađen poslovni objekat od 22 sprata. Dosadašnja praksa Zavoda je bila da se u tekstu, a često i iz naslovu prijedloga može zaključiti koja je krajnja svrha prodaje zemljišta. Kao dokaz ove tvrdnje navodim prijedloge ranijih prijedloga odluka koji su glasili :„Prijedlog Odluke o davanju saglasnosti za potpisivanje ugovora o kupoprodaji nekretnina

između Kantona Sarajevo i Jašarević Adema u skladu sa članom 23. Zakona o eksproprijaciji FBiH u svrhu izgradnje saobraćajnice I transverzale, dionica Kranjčevićeva-Bare-Hotonj“; zatim Prijedlog odluke o davanju saglasnosti za potpisivanje ugovora o kupoprodaji nekretnina između Kantona Sarajevo i G-Petrol d.o.o. Sarajevo, u skladu sa članom 23. Zakona o eksproprijaciji FBiH u svrhu izgradnje saobraćajnice I transverzale, dionica Kranjčevićeva-Bare-Hotonj“; kao i „Prijedlog odluke o davanju saglasnosti za potpisivanje ugovora o neposrednoj zamjeni nekretnina između Kantona Sarajevo i firme “BLOK” d.o.o Sarajevo radi oblikovanja građevinske parcele u svrhu izgradnje poslovnog objekta (prodajno-servisnog centra) na lokaciji Ilidža-Stup i okončanja rješavanja imovinsko-pravnih odnosa na trasi saobraćajnice XII transverzale sporazumnim putem“.

Dva mjeseca kasnije iz medijskih članaka i materijala za sjednicu Općinskog vijeća Općine Centar, građani, ali i zastupnici saznaju krajnju svrhu donošenja ove Odluke. Naime u Prijedlogu koji su u materijalima dobili vijećnici Općine Centar tačno se navodi da je svrha prodaje izgradnja poslovnog objekta – kule, koja ne prelazi maksimalnu dozvoljenu spratnost susjednih objekata uz odobrenje za povećanje spratnosti na zapadnom dijelu planiranog objekta. Iz svega navedenog, jasno je da su vijećnici Općinskog vijeća Centar, dobili mnogo potpunije informacije o tome za šta glasaju, od zastupnika u Skupštini Kantona Sarajevo. Da je Zavod Prijedlog odluke sastavio koristeći se ranijim primjerima i ne izostavljajući bitne elemente iz naslova, ali i teksta odluke, vjerujem da bi prije usvajanju iste prethodila šira rasprava zbog čega bi ishod glasanja vjerovatno bio drugačiji.

Ostale inicijative, kao i ovu, dostavljam u pisanoj formi i molim da mi se pismeno i odgovori.

Poslanik/zastupnik Bilsena Šahman:

Zahvaljujem predsjedavajući, pozdravljam sve prisutne kao i gledaoce kraj malih ekrana. Imam dva pitanja. Jedno je za Ministarstva. Moj kolega Zvonko je postavio već određeno pitanje ali ja samo želim da pitam da li smo dobili testove za utvrđivanje Korona virusa i ako jesmo, koliko i gdje se može izvršiti testiranje ukoliko nismo, zašto? Tražim informaciju od Federalnog Ministarstva ili Ministarstva civilnih poslova, da naši građani imaju informaciju o tome.

Za Ministarstvo obrazovanja, da li imaju neki plan u slučaju velike epidemije. I sada već imamo virus koji hara među djecom i većina djece ima visoku temperaturu čak pola razreda ne dođe na nastavu. Da li se može raditi u školama on line nastava i kakav je stav vezan za odlazak na ekskurzije djece iz srednjih i osnovnih škola. Zahvaljujem. Usmeni odgovori.

Poslanik/zastupnik Neira Dizdarević:

hvala uvaženi predsjedavajući. Pozdravljam sve prisutne u sali kao i građane koji prate naš današnji rad. Pa evo na tragu ovoga što su prethodnici govorili ja bih također molila za usmeni odgovor ministricе zdravstva odnosno nekoga vezano za aktuelnu situaciju u regionu i širenje Korona virusa radi informisanja građana Kantona Sarajevo koliko smo spremni za eventualnu pojavu Korona virusa kod nas.

Moje drugo pitanje također zahtjeva usmeni odgovor. Radi se o jednom od zaključaka sa tematske sjednice iz oblasti obrazovanja koju smo imali u mjesecu oktobru a koji je bio da će se u naredna tri mjeseca održati tematska sjednica vezano za obrazovanje djece sa poteškoćama u razvoju. Taj rok je istekao u mjesecu januaru. Pa evo ako može ministrica obrazovanja da odgovori da li se sprema ta sjednica. U kojoj fazi su navedeni materijali.

I moje treće pitanje na koje ću moliti pismeni odgovor od strane Ministarstva zdravstva zdravstvenog osiguranja, odnosi se na inicijativu koju sam radila u saradnji sa Udruženjem dajte nam šansu o izmjenama i dopunama Odluke o ličnom učešću osiguranih lica u troškovima liječenja na teritoriji Kantona Sarajevo u smislu oslobađanja od participacije osoba sa poteškoćama i njihovih staratelja te omogućavanja banjskog liječenja za djecu sa poteškoćama u razvoju sa invaliditetom 60% i više. Prije godinu dana sam dobila parcijalni

odgovor da su određene izmjene napravljene. U praksi nema nikakvih pomaka, pa ukoliko mogu dobiti informaciju u kojoj fazi je navedena inicijativa.

Poslanik/zastupnik Admela Hodžić:

zahvaljujem predsjedavajući. Pozdravljam sve prisutne kao i sve one koji na bilo koji način prate naš rad. Upućujem inicijativu Skupštini Kantona Sarajevo da donese sljedeći zaključak: Obustavlja se rad nezavisnih tijela Skupštine Kantona Sarajevo Nezavisnog odbora i Odbora za žalbe javnosti do donošenja odluke o potvrđivanju Vlade Kantona Sarajevo. Ovaj zaključak stupa na snagu danom donošenja. Obrazloženje: Vlada Kantona Sarajevo kojoj je izglasano nepovjerenje nastavlja sa radom do donošenja Odluke o potvrđivanju Vlade Kantona Sarajevo. Nezavisni odbor, nezavisno tijelo Skupštine Kantona Sarajevo donosi prijedlog godišnje ocjene rada policijskog komesara u pisanoj formi ili za period rada u godini do kada je imenovan na poziciju policijskog komesara do 31.12. te godine. Nezavisni odbor može donijeti ocjenu zadovoljava ili ne zadovoljava u skladu sa članom 46 Zakona o unutrašnjim poslovima Kantona Sarajevo neovisno od prijedloga ocjene rada policijskog komesara kojeg utvrdi NO. Vlada Kantona Sarajevo može donijeti ocjenu koja može biti po prijedlogu Nezavisnog odbora ili suprotno. Dakle, onakva kakvu oni smatraju da trebaju dati. A ista može imati političku konotaciju. Pojedini ministri koji su imenovani iz političkih stranaka, te pojedini visoko pozicionirani članovi iz političkih partija imaju bliske kontakte sa policijskim komesarom te iskazujem bojazan da isti neće biti profesionalni nego će biti politički motivisani, pristrasni pri donošenju odluke radi čega podnosim ovu inicijativu. Podnosim inicijativu Ministarstvu za obrazovanje, nauku i mlade da u što skorije vrijeme izmjeni član 7. Zakona o srednjem obrazovanju Kantona Sarajevo ("Sl. novine Kantona Sarajevo", br. 23/17 i 30/19), koji se odnosi na trajanje srednjeg obrazovanja.

Predsjedavajući:

Vrijeme kolegice.

Poslanik/zastupnik Admela Hodžić:

Zahvaljujem. Ostalo ću dostaviti u pisanoj formi.

Poslanik/zastupnik Jasna Duraković:

Zahvaljujem predsjedavajući. Naravno srdačno pozdravljam sve kolegice i kolege prisutne u sali, kao i predstavnike medija i sve one koji prate današnji rad Skupštine. Ja imam par zastupnički pitanja. Samo bih prije toga željela ponoviti ovo pitanje, zapravo inicijativu koju sam uputila na ime Vlade Kantona Sarajevo prvenstveno Ministarstvu finansija i Ministarstvu za obrazovanje i nauku a riječ je o pokretanju, izgradnji zapravo centra za autizam. Nikada nisam dobila nikakav odgovor a to je bilo prije nekih tri mjeseca, pa voljela bih znati da li imamo išta takvo u planu i naravno nadovezat ću se na ono što je rekao kolega Zvonko Marić da je to zaista a priori rekla bih za ovo društvo, sistemska rješenja koja su prijeko potrebna za djecu koja imaju poteškoće u razvoju. Kako intelektualnom tako i drugom razvoju tako da evo voljela bih dobiti odgovor bilo kakav u ovom momentu.

Druga dva zastupnička pitanja upućujem Ministarstvu za obrazovanje nauku i mlade Kantona Sarajevo. S obzirom da Ministarstvo donosi rješenje o oduzimaju institucionalne akreditacije visokoškolskoj ustanovi u slučaju da više ne ispunjava propisane uslove i kriterije ili da utvrđenom roku nije ispunila obaveze iz uslovne akreditacije, mene zanima da li je Ministarstvo oduzelo akreditaciju i jednoj takvoj obrazovnoj instituciji u Kantonu Sarajevo u proteklom periodu i kojoj ako jeste? Naime, pošto su se proteklih godina pojavile opravdane sumnje da određeni novonastali privatni univerziteti ili fakulteti nemaju akreditacije i s posebnim osvrtom govorim ovdje o drugim kantonima u FBiH, bili su neki pod navodima sporni privatni univerziteti u Travniku, Kiseljaku i Vitezu mene zanima da li se vrše

učinkovite provjere i kontrola rada spornih visokoškolskih ustanova koje su započele proces akreditacije u skladu sa zakonom o visokom obrazovanju. Toliko hvala.

Predsjedavajući:

Zahvaljujem kolegice Duraković. Samo nam niste kazali da li usmeno ili pismeno. Pismeno. Zahvaljujem.

Poslanik/zastupnik Segmedina Srna Bajramović.

Zahvaljujem predsjedavajući. Pozdravljam sve prisutne.

Na osnovu člana 117. i 120. Poslovnika Skupštine Kantona Sarajevo predlažem da Skupština Kantona Sarajevo donese sljedeće zaključke:

1. Obavezuje se Kantonalna uprava za inspekcijske poslove da izvrši inspekcijski nadzor nad primjenom Zakona o prostornom uređenju Kantona Sarajevo prilikom donošenja Odluke o izmjenama i dopunama Odluke o pristupanju izradi izmjena i dopuna Regulacionog plana "Gradski centar Marijin Dvor za lokalitet Kvadrant "B" usvojenog 24.04.2019. godine
2. Obavezuju Kantonalna uprava za inspekcijske poslove da naročito provjeri provedbu člana 34. stav (3) Zakona o prostornom uređenju KS (24/17) prilikom donošenja Odluke o o izmjenama i dopunama Odluke o pristupanju izradi izmjena i dopuna Regulacionog plana "Gradski centar Marijin Dvor za lokalitet Kvadrant "B" usvojenog 24.04.2019. godine kojom se propisuje obaveza izrade Strateške procjene uticaja na okoliš prilikom izrade planskih dokumenata što uključuje i izmjene i dopune regulacionih planova
3. Obavezuje se Grad Sarajevo, Ministarstvo prostornog uređenja, građenja i zaštite okoliša, kao i Kantonalna uprava za inspekcijske poslove da u roku od mjesec dana obavijesti Skupštinu Kantona Sarajevo o poduzetim aktivnostima vezanim za gore navede zaključke.

Molim zastupnike Skupštine Kantona Sarajevo da se izjasne o ovim zaključcima koje ću svakako dostaviti u pisanoj formi.

Dalje, molim Kantonalni zavod za zaštitu kulturno-historijskog i prirodnog naslijeđa Sarajevo da mi dostavi Elaborat "Reklame historijskog jezgra grada".

I imam jedno zastupničko pitanje. S obzirom da imamo ozbiljne optužbe o nepotizmu u smislu istraživačkog novinarstva pojedinih portala, kada je u pitanju zapošljavanje u VIK-u mislim da je interes svih nas da danas dobijemo odgovor i menadžmenta i vlade da li je istina da su se kolokvijalno rečeno, tri koljena familijarno zapošljavala u ovom javnom preduzeću? Ova vlada i parlamentarna većina je sav svoj kredibilitet stekla na transparentnosti i otvorenosti i stoga ga treba sačuvati do zadnjeg dana bez obzira na bilo kojeg pojedinca.

Također sam imala pitanje vezano za Korona virus, ali odustajem od njega, iako su građani uznemireni i danas smo dobili plan što pokazuje da institucije rade. U ovom momentu najvažnije je da kvalitetno komuniciramo jer se to očigledno pokazalo ključnim i kod epidemije Morbila. Dakle džaba nama svi planovi ako zavlada panika i blokira sve institucije sistema. Toliko zahvaljujem.

Predsjedavajući:

Zahvaljujem kolegici Srni Bajramović. Samo nije nam jasno da li želite pismeni ili usmeni odgovor vezano za zapošljavanje, da se ministar može pripremiti, odnosno da li treba direktor VIK-a koliko sam razumio.

Poslanik Segmedina Bajramović:

Pa ukoliko je ministar u mogućnosti odgovoriti na ovo pitanje kako bi smo otklonili sve sumnje zamolila bih da odgovori, ako ne, može i u pisanoj formi. Zahvaljujem.

Predsjedavajući:

U pisanoj formi kazao je već uvaženi ministar Mandić.

Poslanik Elmedin Konaković:

Zahvaljujem predsjedavajući. Srdačno pozdravljam cijenjeno rukovodstvo, zastupnike, ministre i ministrice u vladi, cijenjene goste i gledaoce TVSA. Ja imam jednu inicijativu koja je upućena Službi za zapošljavanje, Ministarstvu za rad, socijalnu politiku, raseljena lica izbjeglice. Molim nadležne da nastave projekat zapošljavanja članova porodica šehida i palih boraca. Obrazloženje: nakon ranije pokrenute inicijative u okviru projekta Aktivne mjere zapošljavanja implementiran je i dio koji se odnosi na ovu populaciju. Posao će dobiti blizu 200 osoba a na evidenciji se nalazi preko 600 članova porodica šehida i palih boraca. Naš dogovor od starta je da se ova aktivnost implementira sve dok na birou ne bude ni jedna osoba koja pripada ovoj populaciji a želi da radi. Obaviješten sam da postoje sredstva koja su već rezervisana i samo ovom inicijativom želim da ove institucije nastave implementaciju već započetog projekta. Hvala.

Poslanik/zastupnik Jasmina Bišćević Tokić:

Zahvaljujem predsjedavajući. Ja imam za danas jednu inicijativu Skupštini Kantona Sarajevo. Predlažem da se donese sljedeći zaključak a razlog da je evidentno da se posljednjih mjeseci vrši proces zapošljavanja većeg broja ljudi u institucije Kantona Sarajevo koji nije u skladu sa budžetom planiranim za narednu godinu, te da su raspisana i da se vrše konstanto nova raspisivanja konkursa.

1. Zabranjuje se Vladi Kantona Sarajevo i resornim ministarstvima davanje saglasnosti za prijem u radni odnos uposlenika na određeno i neodređeno vrijeme, u organima uprave Kantona Sarajevo, zavodima, direkcijama, agencijama, upravnim organizacijama, pravnim licima sa javnim ovlaštenjima, na teritoriji Kantona, javnim preduzećima i javnim ustanovama čiji su osnivači Kanton.

2. Obavezuju se javni subjekti iz tačke 1. Zaključka da ponište javne konkurse za prijem u radni odnos koji su u toku, kao i da obustave prijem u radni odnos bez javnog konkursa.

3. zabranjuje se javnim subjektima donošenje novih izmjena ili dopunu postojećih pravilnika o unutrašnjoj organizaciji i sistematizaciji radnih mjesta, ili drugih akata kojima se vrši pitanje sistematizacije radnih mjesta, kao i interna premještanja zaposlenika unutra ustanova, preduzeća, organa uprave ili ministarstava.

4. Obavezuje se Vlada Kantona Sarajevo, nadzorni i upravni odbor ovisno od nadležnosti da ponište konkursne procedure i obustave dalju proceduru izbora i imenovanja direktora i članova upravnih javnih subjekata iz tačke 1. zaključka koji su u toku.

5. Zaključak stupa na snagu danom donošenja.

Poslanik/zastupnik Igor Stojanović:

Hvala predsjedavajući. Dakle imajući u vidu alarmantno stanje kada je u pitanju kvalitet zraka u Kantonu Sarajevo kao i rezultate studije u urbanim ventilacionim koridorima i uticaju visokih zgrada pokrećem inicijativu da Skupština usvoji zaključak i molio bih da se Skupština izjasni o ovome.

1. Zadužuju se Ministarstvo prostornog uređenja, građenja i zaštite okoliša i Zavod za planiranje razvoja Kantona Sarajevo, da na osnovu zaključaka i preporuka sadržanih u "Studiji o urbanim ventilacionim koridorima i uticaju visokih zgrada" ubrzaju pripremu Odluke o izmjenama i dopunama Odluke o zaštiti i poboljšanju kvaliteta zraka u Kantonu Sarajevo.

2. Zadužuju se nosioci pripreme i izrade planske dokumentacije (Grad, općine i Zavod za planiranje razvoja Kantona Sarajevo), da prilikom donošenja nove, odnosno izmjena i dopuna važeće planske dokumentacije, kao i planova čija je izrada u toku, provode zaključke i preporuke sadržane u "Studiji o urbanim ventilacionim koridorima i uticaju visokih zgrada", usvojenoj od strane Vlade Kantona Sarajevo, kao i uslove koje je potrebno poštovati, prema važećem Urbanističkom planu Grada Sarajeva od 1985-2015. godine, donesenom 1990. godine od strane Skupštine grada Sarajeva, a čiji prečišćen tekst je 1999. godine utvrdila Zakonodavno-pravna komisija Skupštine Kantona Sarajevo.

Moja druga inicijativa također se odnosi na zaključak i želim da se Skupština izjasni o ovim zaključcima:

Zadužuje se Pravobranilaštvo Kantona Sarajevo, Uprava za imovinsko-pravne i geodetske poslove Kantona Sarajevo, Ministarstvo pravde i uprave i Ministarstvo prostornog uređenja, građenja i zaštite okoliša, da analiziraju i daju primjedbe i prijedloge na Nacrt Zakona o građevinskom zemljištu Federacije Bosne i Hercegovine vodeći računa o interesima i zaštiti imovine Kantona Sarajevo.

1. Zadužuje se Pravobranilaštvo Kantona Sarajevo da pripremi informaciju i objedini dostavljene primjedbe i prijedloge u skladu sa zaduženjima iz tačke 1., te istu u formi radnog materijala dostavi Skupštini najkasnije u roku od 15 dana od donošenja ovog zaključka.
2. Zadužuje se Kolegij Skupštine, da razmotri i utvrdi termin održavanja tematske sjednice na kojoj će se razmatrati odredbe Nacrta Zakona o građevinskom zemljištu Federacije Bosne i Hercegovine sa ciljem zaštite imovine i interesa Kantona, vodeći računa o rokovima datim za javnu raspravu.
3. Zadužuje se Služba za skupštinske poslove da blagovremeno uputi poziv za prisustvo sjednici predlagачu navedenog Nacrta zakona - Federalnoj upravi za geodetske i imovinsko-pravne poslove.
4. Zadužuje se Pravobranilac Kantona Sarajevo i direktori: Uprave za imovinsko-pravne i geodetske poslove Kantona Sarajevo, Zavoda za izgradnju Kantona Sarajevo, Zavoda za planiranje Kantona Sarajevo, Direkcije za puteve Kantona Sarajevo, Fonda Kantona Sarajevo za izgradnju stanova, Kantonalnog stambenog fonda, da prisustvuju navedenoj sjednici ili da obezbijede prisustvo ovlaštenog lica.

Predsjedavajući:

Vrijeme kolega.

Poslanik/zastupnik Igor Stojanović.

Vrijeme je prošlo ja ću ova svoja pitanja postaviti u pismenoj formi. Ovo sam pročitao zaključke koje tražim izjašnjenje.

Poslanik/zastupnik Elvis Vreto:

Hvala predsjedavajući. Pozdravljam sve prisutne kao i građane koji nas prate. Danas imam nekoliko pitanja i inicijativa. Prvo pitanje se odnosi na Ministarstvo prostornog uređenja, građenja i zaštite okoliša zašto u zadnje vrijeme nisu dostupne informacije i podatci na nekim mjernim stanicama vezano za mjerenje kvalitete zraka u Kantonu Sarajevo?

Drugo pitanje je za Vladu odnosno Ministarstvo pravde i finansija zašto se ne izvršava odluka- presuda Ustavnog suda vezano za obavezu isplate oštećenih radnika nekadašnjeg Sarabona i koje aktivnosti se poduzimaju da se radnici isplate? Obzirom da je poznato je da njihova agonija traje više od 15 godina, Ustavni sud je presudio u njihovu korist i obavezao Kanton Sarajevo da u roku šest mjeseci izvrši presudu odnosno isplati oštećene radnike Sarabona. Ministarstvo pravde je u prethodnih nekoliko mjeseci, aktueliziralo rješavanje

navedenog pitanja ali još uvijek nema izvršenja i isplate. Tražim da mi se dostavi odgovor po navedenom pitanju kao i informacija o aktivnostima koje se trenutno poduzimaju.

Inicijativa za koju tražim izjašnjavanje Skupštine jeste vezana za vezano za izmjene i dopune odluke o uplati sredstava za realizaciju usluga Ministarstva za obrazovanje, nauku i mlade i budžetske korisnike iz nadležnosti ministarstva odnosno prijedlog je da se izmjenu i dopuni Odluke u Članu 2, stav (3) pod d, e i g : vezana je za registraciju auto škola za poslove osposobljavanja i poznavanja propisa i sigurnosti saobraćaja. Kao i za registraciju auto škola za poslove za osposobljavanje iz upravljanja motornim vozilima B kategorije i odgovarajuće potkategorije.

Ovu inicijativu sam uputio 28.08.2019 godine iz razloga što u postupku i pokretanju procedure za otvaranje auto škole ne spominje se kao uslov taksa za registraciju od 2, 5 i 7000 u zavisnosti od vrste zahtjeva. Od podnosioca zahtjeva traži se da nakon izdatog rješenja, prilikom preuzimanja ovjerenih cjenovnika i matične knjige, uplati navedeni iznos tzv takse. Pokrenuo sam navedenu inicijativu da se pristupi izmjenama jer smatram da je ovo bespotrebni fiskalni nameti koji bi se trebali svoditi na minimum.

Opredjeljenje ove Skupštine i Vlade Kantona Sarajevo je ukidanje, smanjenje administrativnih prepreka, kao i troškova pokretanja za neke od djelatnosti, kako bi se privreda razvijala uz što manje birokratskih procedura i finansijskog opterećenja , a što u konačnici treba da rezultira povećanim brojem uposlenih.

Inicijativa je razmatranu na 38. sjednici Vlade 19.09.2019. godine, informaciju sam dobio na moje zastupničko pitanje od premijera premijera da je ona usvojena. Međutim, u nekom postupku, kako je do toga došlo mi još uvijek nismo ona nije realizovana.

Ponovo sam uputio inicijativu 09.12.2019.godine. Obzirom da nisam dobio izjašnjenje od Vlade na osnovu člana Poslovnika 213 o radu Skupštine Kantona tražim od Skupštine da se izjasni kako bi u slučaju pozitivnog ishoda konačno bila implementirana. Pitanja dostavljam u pisanoj formi. Hvala.

Poslanik/zastupnik Damir Nikšić:

Zahvaljujem predsjedavajući. Pozdravljam gledaoce i sve prisutne. Zastupnička inicijativa. Ja bih imao jednu zastupničku inicijativu da se Skupština Kantona Sarajevo danas izjasni o tome da se Prijedlog odluke o davanju saglasnosti za potpisivanje ugovora o kupoprodaji nekretnina neposrednom pogodbom u skladu sa članom 363 stav 3) Zakona o stvarnim pravima FBiH u svrhu oblikovanja građevinske parcele A3 na lokalitetu Marin Dvor koji je bio tačka 10. na 15 radnoj sjednici Skupštine Kantona Sarajevo 19.11.2019 ponovo stavi na dnevni red, tj na izjašnjavanje Skupštini na narednoj sjednici. Obrazloženje: smatram da zastupnici u ovoj Skupštini nisu raspolagali adekvatnom informacijom za donošenje svoje odluke tada. Hvala.

Poslanik/zastupnik Senad Hasanović:

Zahvaljujem predsjedavajući, pozdravljam sve prisutne u sali kao i gledaoce kraj malih ekrana. Za ovu sjednicu imam dvije inicijative. Pokrećem inicijativu kojom tražim od Vlade Kantona Sarajevo da prikupi i Skupštini Kantona Sarajevo dostavi informacije:

koje su institucije javne ustanove i preduzeća čiji je osnivač Kanton Sarajevo u periodu 01.01.2019 do 31.12.2019 izvršile promjene u pogledu zakupljenog poslovnog prostora, od koga su zakupile novi poslovni prostor, pod kojim uslovima i iz kog razloga.

Druga inicijativa, upućujem inicijativu Kantonalnoj ustanovi za zaštićena područja Kantona Sarajevo i to odjelu za upravljanje zaštićenim pejzažom Trebević da zabrani ili ograniči kretanje motornih vozila cijenom dužinom Apelove ceste na području oko bob staze i oko dolazne stanice Trebevičke žičare. Obrazloženje: s obzirom na značajno povećanje broja posjetitelja zaštićenog pejzaža Trebević smatram da je na pomenutoj lokaciji potrebno ograničiti ili zabraniti kretanje motornih vozila. Dodatni razlog za ovu inicijativu jeste stanje

postojeće cestovne infrastrukture koja nije prilagođena za odvojeno kretanje pješaka i motornih vozila, na kojoj ne postoji horizontalna i vertikalna signalizacija i na kojoj kretanje motornih vozila ozbiljno ugrožava kretanje posjetitelja. Zahvaljujem.

Dopredsjedavajuća Kristić Danijela:

Zahvaljujem predsjedavajući, pozdravljam sve prisutne i gledaoce kraj malih ekrana. Ja imam zastupničko pitanje prema Ministarstvu zdravstva Kantona Sarajevo i da se odgovori pisanim putem. Da li je do sada utvrđen pravni okvir p o kojem se Opća bolnica Abdulah Nakaš i Klinički centar Sarajevo izvršile raspodjelu prijema urgentnih slučajeva, budući da raspodjela dogovorena tek usmeno, bez ikakvog pravnog osnova, niti potpisanog dokumenta kako se to tvrdi u medijima. Da li Ministarstvo ima informaciju da li shodno podjeli prijema pacijenata i izvršena preraspodjela sredstava za pomenute prijeme.

Na osnovu člana 117 i 120 Poslovnika Skupštine Kantona Sarajevo predlažem da Skupština Kantona Sarajevo donese sljedeće zaključke.

- Obavezuje se Skupština Kantona Sarajevo da u roku do 2 mjeseci održi tematsku sjednicu u vezi sa stanjem u vodozaštitnoj zoni “Sarajevsko polje”
- Obavezuje se Vlada Kantona Sarajevo i resorna ministarstva da na vrijeme pripreme cjelovitu informaciju o stanju u vodozaštitnoj zoni “Sarajevsko polje”
- Obavezuje se KJKP “Vodovod i kanalizacija” da Skupštini Kantona Sarajevo dostavi cjelovitu informaciju o poduzetim aktivnostima na zaštiti unutar vodozaštitne zone “Sarajevsko polje”, kao i kopije dokumenata-akata upućivanim drugim javnim organima po ovom pitanju u proteklom godinama
- Obavezuju se Općina Ilidža, Općina Trnovo da za tematsku sjednicu pripreme cjelovitu informaciju o stanju unutar vodozaštitne zone “Sarajevsko polje” iz svoje nadležnosti, a naročito o aktivnostima općinskih inspekcija
- Obavezuje se Skupština Kantona Sarajevo da u konsultaciji sa Vladom i resornim ministarstvima, kao i sa Univerzitetom u Sarajevu i ostalim stručnim institucijama na tematsku sjednicu pozove što je moguće više stručnjaka uz molbu da pripreme kratki materijal u kojem bi izložili svoje stručno viđenje situacije o stanju vodozaštitne zone “Sarajevsko polje”.
- Obavezuje se Skupština Kantona Sarajevo da u saradnji sa resornim ministarstvom na tematsku sjednicu pozove stručna lica koja su radila na izradi “Elaborata zaštite izvorišta vode za piće Sarajevsko polje”

molim zastupnike da se izjasne o navedenim zaključcima. I još bih tražila od Ministarstva zdravstva usmeno odgovor. U drugom mjesecu sam podnijela inicijativu da se lijekovi grupe inhibitora protonske pumpe i H2 blokatori stave na esencijalnu listu bez vremenskog ograničenja za dijalizne i transplantirane pacijente. Ova inicijativa je u četvrtom mjesecu usvojena, podržao je i Klinički centar i ZZO ali nikada nije realizovana do današnjeg dana. Pa da vidimo dokle je ta inicijativa, gdje je zapelo i zašto nije realizovana evo skoro 10 mjeseci. Hvala.

Poslanik/zastupnik Haris Pleho:

Zahvaljujem predsjedavajući. Prije svega sve želim srdačno da pozdravim i poselamim kao i gledaoce pored malih ekrana. Za danas imam dva tri pitanja.

Prvo pitanje upućujem Ministarstvu saobraćaja Kantona Sarajevo. Budući da smo svjedoci katastrofalnog stanja tramvajske pruge a posebno u centralnom dijelu grada na Marin dvoru na potezu državnih institucija Skenderija najljubaznije vas molim da mi odgovorite d ali je uopće razmatrana rekonstrukcija ovog dijela tramvajske pruge koji je neprimjenjiv za bilo koji grad a posebno za glavni grad BIH. Da li je u toku tenderska procedura i da li su predviđena budžetska sredstva za realizaciju i ako jesu predviđena kada se očekuje. Ukoliko

sve ovo nije u planu pokrećem inicijativu da se projekat rekonstrukcije uvrsti u vrh prioriteta dolazeće vlade.

Drugo pitanje je upućeno ministarstvu saobraćaja a odnosi se koliko je sredstava iz budžeta Kantona Sarajevo utrošeno za projekat sistema zatvorenih stajališta a evidentno je da na terenu nije ništa urađeno. I još jedno treće pitanje koje upućujem Ministarstvu za obrazovanje a glasi: prije dvije godine predložen je od strane predsjednika sindikata srednjeg obrazovanja Faruka Bešlića projekat posjete Srebrenice pod nazivom „Da se ne zaboravi”: ovaj projekat podržali su Vlada i Skupština Kantona Sarajevo navedeni projekat realizuje Ministarstvo za obrazovanje nauku i mlade. Molim vas da mi dostavite pojedinačno specifikaciju svih troškova realizacije navedenog projekta kao i spisak osoba koje su realizovali i to za 2018 i 2019 godinu. Na osnovu uvida u izvor projekta može se konsultovati da se on ne provodi onako kako je predviđeno. Hvala lijepo.

Poslanik/zastupnik Amel Mekić.

Hvala vam predsjedavajući. Pozdravljam sve prisutne i gledaoce ispred TV ekrana. Vidjeli smo na društvenim mrežama a i neki mediji su prenijeli fotografiju na kojoj je vidljivo da se zastupnik u Skupštini Kantona Sarajevo gospodin Fahrudin Pecikoza nalazi u situaciji koja je potencijalno inkriminirajuća u smislu počinjenja krivičnog djela vezano za konzumiranje opojnih droga. Pa postavljam pitanje za komesara i ministara MUP-a Kantona Sarajevo gospodina Katicu. Prvo pitanje, da li je navedeno provjereno od strane policije? Drugo pitanje, da li je od strane Tužilaštva traženo određeno postupanje policije po ovom pitanju? Molim vas za usmeni odgovor. Hvala.

Poslanik/zastupnik Milavica Sead:

Zahvaljujem predsjedavajući. Pozdravljam sve prisutne kao i gledaoce pored malih ekrana. Ja za danas imam jednu zastupničku inicijativu. Pokrećem inicijativu da se studentima Medicinskog fakulteta UNSA sa prosjekom iznad 8 omogući prelazak iz statusa samofinansirajućih studenata u status studenata koji se finansiraju iz sredstava osnivača, kako je i propisano Zakonom o visokom obrazovanju. To je već objavljeno u Službenim novinama Kantona Sarajevo broj 33/17, član 164 stav 5) koji glasi: „Ako je student koji plaća školarinu u određenoj studijskoj godini položio sve ispite iz te godine i postigao prosječnu ocjenu najmanje 8, može dobiti javno finansirano mjesto za nastavak studija na tom ciklusu, što se preciznije uređuje Statutom”.

Obrazloženje:

Medicinski fakultet u Sarajevu je odlukom broj 013154/20 onemogućio prelazak redovnih samofinansirajućih studenata sa prosjekom iznad 8 na status studenata koji se finansiraju iz sredstava osnivača. Pomenuta inicijativa da se ovakva odluka stavi van snage zasigurno doprinos da se znatno pomogne i poboljša status studenata koji izdvajaju velika finansijska sredstva na godišnjoj razini ali i motiviraju studenti za ostvarivanje što boljih rezultata sa dugoročnim ciljem formiranja respektabilnih stručnjaka ovog domena. Hvala.

Predsjedavajući:

Hvala zastupniku Milavici. Sljedeći za inicijativu, ja evo koristim priliku da uputim jednu inicijativu pa ona glasi: podnosim inicijativu za izmjenu Odluke o proglašenju 5.februara Danom sjećanja na sve stradale građane Grada Sarajeva u periodu opsade 1992-1995.godine. Obrazloženje: Svjedoci smo bili stravičnih zločina počinjenih nad stanovnicima Sarajeva tokom najduže opsade u historiji čovječanstva. U znak sjećanja na sve žrtve brutalne agresije počinjene od strane agresora, o čemu, također svjedoči i postojanje i djelovanje Haškog tribunala, koji je i ustanovio i dokazao odgovornost izvršilaca za masakr na Markalama, 5. februara 1994.godine. Tog dana je ubijeno 68 naših sugrađana, a 144 ranjeno. To je ujedno i bio povod da se 2007. donese Odluka o proglašenju tog datuma Danom sjećanja na sve

stradale građane Grada Sarajeva u periodu opsade 1992-1995. godine. Cijenim da spomenutu Odluku treba izmijeniti u nazivu i u daljem tekstu, tako da glasi: Odluka o proglašenju 5.februara Danom sjećanja na sve ranjene i ubijene građane Grada Sarajeva od strane agresora u periodu 1992-1995.godine. Predlažem Skupštini da podrži ovu inicijativu izjašnjavanjem o istoj, te da se nakon izjašnjavanja ova inicijativa uputi Komisiji za obilježavanje, čuvanje i njegovanje historijskih događaja i ličnosti Skupštine Kantona Sarajevo u dalju proceduru, kako bi sačinila novi prijedlog ove odluke i dostavila Skupštini na razmatranje i usvajanje.

Obzirom da nemamo više prijavljenih, a imamo veliki broj inicijativa i zaključaka o kojima bi se trebali izjasniti, ja predlažem da krenemo sa usmenim odgovorima, a da stručne službe pripreme i podijele inicijative i zaključke o kojima se treba Skupština treba izjasniti i da nakon toga bude pauza pet, deset minuta kako bi se klubovi očitovali o istim i da nastavimo sa sjednicom Skupštine Kantona Sarajevo.

Prvi koji je tražio usmeni odgovor je uvaženi zastupnik Marić Zvonko. A tiče se Ministarstva zdravstva vezano za informaciju o Korona virusu. Ministrica Sofić hoćete li sa svog mjesta ili? Evo izvolite, ministrica Sofić Amela.

Ministrica Amela Sofić:

Kako dozvolite, meni je sasvim svejedno. Prije svega dobar dan. Dakle od jutros od 9 sati prvo na Kolegiju skupštinskih zastupnika imali smo razgovore vezano za trenutnu situaciju Korona virusa u svijetu i Europi. Onda je krizni štab u 9,30. on još uvijek traje, na njemu sam bila i mene su obavijestili da siđem i da dam odgovore. Dakle prije nekih mjesec dana Federalno Ministarstvo zdravstva je uvaženi ministar Vjekoslav Mandić, ministar zdravstva je osnovao Federalni krizni štab i naložio da svi kantoni također naprave krizne štabove vezano za pojavu Korona virusa koja je tretirala kao globalni svjetski problem od strane SZO. Dakle ovo Ministarstvo je isti dan formiralo, Kanton Sarajevo je imao krizni štab prije svih drugih. I nekako čak može se slobodno reći da idemo i ispred Federacije s obzirom da s njima stalno kontaktiramo s njihovim kriznim štabovima. U kriznom štabu su direktori svih važnijih zdravstvenih ustanova, odnosno većih zdravstvenih ustanova, epidemiolozi i uključujući direktoricu Zavoda za javno zdravstvo koja je šef kriznog štaba. Oni se svakodnevno komuniciraju i prate epidemiološku situaciju koju inače i nadzire Zavod za javno zdravstvo. Napravljen je krizni plan pripravnosti za postupanje nadležnih institucija u Kantonu Sarajevo u cilju preduzimanja mjera zaštite stanovništva zaraznih bolesti u svjetlu globalne krize vezane za pojavu novog Korona virusa koji se zove 2019 NCOVD. U sklopu toga napravljen je algoritam postupaka u ovakvoj situaciji i to se zove entry point, ulaznu tačku u Kantonu Sarajevo za stavljanje pod nadzor. I on je na snazi već nekih 3 sedmice od kako je donesen. Ono što je važno da građani Sarajeva treba da znaju da sve osobe koje imaju konekciju ili su bile u Kini, ili sa Kinezima, evo od neki dan i sa Italijom, ne treba na prvu da idu u zdravstvenu ustanovu. To su potencijalno zdravi ljudi dok se ne dokaže suprotno. Postoje mobilni telefoni u sklopu ovoga projekta kojeg smo dostavili i mi se stalno oglašavamo putem medija. Oni treba da zovu telefon tzv dežurne epidemiološke službe u Zavodu za javno zdravstvo IHESA gdje dobivaju sve instrukcije. To što je neko boravio u kriznom području, ne znači da je bolestan ali znači da mora da bude u izolaciji. U kućnoj izolaciji jer 14 d 15 dana je vrijeme inkubacije. Nakon 14 do 15 dana ukoliko se ne razviju simptomi on je praktično slobodan, izvan te izolacije. Ukoliko se jave simptomi također se zove oni koji su karakteristični za Korona virus, da sada ovdje ne pričamo, ulazak respiratornim putem itd, onda se također zove telefon, i mobilni tim koji radi 24 sata sastavljen od radnika iz Doma zdravlja, Hitne pomoći, sa posebnom opremom dolazi u stan i pregledava pacijenta. Dalji tok je infektivno odjeljenje. Ja imam danas informaciju sa kriznog štaba da se pravi izolatorij u Podhrastovima. Znači Klinika za plućne bolesti. Ono što bi bilo za laike dobro da znaju da

izolatorij nije isto što i karantin. Govorimo o kućnom izolatoriju, izolatoriju bolničkom, karantin može biti i škola i kasarna i kruzer. Mislim da vertikalni nivoi vlasti treba da se uključe u mjere predostrožnosti. Možda mi ne budemo imali epidemiju. Mi trenutno nemamo ni jednog zaraženog, ne samo u BIH, nego u regiji. Svi do sada testirani su bili negativni ali to ne znači da ne moramo biti pripralni u mjeri predostrožnosti i da gledamo unaprijed. Tako da je ovom prilikom pozivam i vertikalne institucije, vertikalne nivoe vlasti koji treba da preduzimaju mjere predostrožnosti u koliko se desi epidemija. Ako ima nekih konkretnih pitanja ja stojim na dispoziciji.

Predsjedavajući:

Uvažena ministrice samo da odgovorite uvaženoj zastupnici Dizdarević koliko smo spremni za Korona virus? To je bilo njeno pitanje. I kolegica dopredsjedavajuća Kristić je tražila usmeni odgovor pa ukoliko treba da ponovimo.

Ministrica Amela Sofić.

Što se tiče naše spremnosti, dakle zdravstvene ustanove imaju novac također da nabave određenu količinu zaštitne opreme, međutim Civilna zaštita Kantona Sarajevo je već odobrila sumu od 150.000 KM koja ide na Vladu i koja će biti odobrena također za nabavku opreme. Međutim, ja vama moram da kažem da ovo nije samo kantonalni problem, da eventualne epidemije nisu samo kantonalni problem, čak ni samo federalni problem. Mi smo jučer jutro uputili također Federalnom Ministarstvu zdravstva zahtjev da se odobre hitno sredstva na sjednici Vlade FBiH kako bi se nabavila zaštitna oprema. To je ono što u ovom momentu mi radimo i naravno u kriznom štabu su eksperti Ministarstva zdravstva, Ministarstvo je uključilo eksperte iz te struke i pratimo tu situaciju. Mi smo poduzimamo sve korake ali sam Kanton ne može sve završiti. Sredstva su i Federalnoj Vladi. Također i država u slučaju državni nivo mora također u slučaju velikih karantina. Ovo je sve mjera predostrožnosti. Nema razloga za paniku ali ne možemo biti nespremni, kako to kod nas kažu zimi iznenadio nas snijeg. Znači mi moramo biti spremni za sve moguće varijante i Kanton i Federacija i sve institucije. Što se tiče ovog drugog pitanja ja bih zamolila da mi još jednom pročita, ja se stvarno izvinjavam da ne bih šta pogriješila. Jel se to radi na inhibitore protonske pumpe za hemodijalizu. Jesam li dobro shvatila. Tačno je da ste vi podnijeli inicijativu za transplantirane i hemodijalizirane pacijente u vezi inhibitora protonske pumpe i u toku su promjene smjernica da se ukine to ograničenje a naravno će to usvojiti Komisija za lijekove i dobit ćete odgovor kada komisija za lijekove dostavi. U svakom slučaju to će biti završeno ali prije usvajanja liste ne može.

Predsjedavajući:

Zahvaljujem uvaženoj ministrici Sofić. Kolega Marić vjerovatno nezadovoljstvo odgovorom. Hajte evo da ako bude potrebno da ponovo postavimo pitanje ministrici. Dajte riječ uvaženoj zastupnici Šahman.

Zastupnica Bilsena Šahman:

Samo sam pitala da li smo dobili testove i u kojem broju imamo testova za Korona virus.

Ministrica Amela Sofić:

Hvala. Upravo smo o tome govorili na kriznom štabu i upravo sam to pitanje ja postavila profesorici i šefici Mikrobiološke službe u KC. Oni su dobili za nekih 300 eventualnih testiranja i ja sam također tražila da se predvidi i planira nabavka većeg broja. Međutim vrlo je važno reći da nam je važno usvajanje budžeta jer nam privremeno finansiranje ograničava bilo kakve preraspodjele i usmjeravanje sredstava iz zdravstvenog novca. Zato nam je taj treći jako važan, da se što prije budžet usvoji kako bi sredstva Ministarstva zdravstva bila dostupna za ove nove priče i nove probleme kao što je Korona virus.

Predsjedavajući:

Nezadovoljstvo odgovorom, vjerovatno. Dajte riječ kolegi Mariću.

Poslanik/zastupnik Zvonko Marić:

Zahvaljujem predsjedavajući. Ja ne mogu biti nezadovoljan ministričnim odgovorima jasno je, ali volio bih samo jedno malo pojašnjenje dodatno i jedno pitanje koje proisteklo iz njenih odgovora. Dobili smo dokument krizni plan pripravnosti za postupanje nadležnih institucija u Kantonu Sarajevo itd. Vezano za Korona virus ali ovdje stoji Sarajevo februar 2019 godine. Je li to od prošle godine. Ili je riječ o grešci. Zbunilo me je. Tehnička greška. I druga stvar ministrice govorili ste o nadležnostima da Korona virus nije samo problem Kantona Sarajevo, nego FBiH i države BiH. Bojim se da u tom nekom vrtlogu našeg sistema dolazimo u situaciju da se odgovornost prebacuje iz jednog dvorišta u drugo. Možete li konkretno da nam kažete ili ću zatražiti možda od državnih institucija odgovor na pitanje ko će biti odgovoran za sve propuste a već ih ima kao što znamo došli su učenici iz Italije sa ekskurzije došlo je još nekoliko ljudi i sami ste naveli na Kolegiju jedan primjer. Za te propuste ko će biti odgovoran. I što se tiče tog izolatorija potpuno je jasno da nije to kosmički brod nego naprosto da se može brzo djelovati napraviti tako nešto ako zahtijevaju uvjeti koje imamo sada. Hvala.

Ministrica Amela Sofić:

Vrlo su slojeviti odgovori na vaša pitanja. Ovo je kucao krizni štab i vjerovatno je napisao 19. i mislim da će se danas ti, pošto krizni štab još traje ovo dopuniti. Ako ste čitali ovaj materijal koji sam vam jutros dostavila odnosi se na kineske provincije i na putnike iz Kine, a to će se danas dostaviti i za Italiju. Dakle on će se proširivati, pa naravno. Ko će biti odgovoran ja to ne mogu da kažem slojevito je pitanje. Ali ono što smo jutros na Kolegiju razgovarali jeste da se na mobilni telefon dežurnog epidemiologa javio građanin Sarajeva i rekao da je došao iz Italije i da je prošao sve granice i da ga niko ništa nije ni pitao ni zaustavio, ni izmjerio temperaturu niti je bilo sanitarnog inspektora, dakle moramo zaista svi ozbiljno shvatiti ovaj problem. Bez panike, hladne glave ali se svi uključiti u rješavanje ovog problema. Mislim da Kanton Sarajevo, to odgovorno tvrdim, po svim svojim aktivnostima prednjači u državi.

Dopredsjedavajuća Danijela Kristić:

Zahvaljujem. Možete li mi samo reći da li je moguće da deset mjeseci se smjernice nisu izmijenile i komisija da nije iste usvojila? I kada možemo očekivati da će smjernice biti izmijenjene i da će ih komisija usvojiti? Imamo li neki vremenski period kada će se to naći na Esencijalnoj listi bez ograničenja dva mjeseca za dijalizne pacijente.

Ministrica Amela Sofić:

Uvažena kolegice, ja ću kontaktirati predsjednika komisije za lijekove i dostavit ću vam detaljne informacije u pismenoj formi. Ono što kažem, dakle to je tijelo koje neovisno od bilo koga donosi svoje odluke i ja ću ukoliko ovih dana tražiti da mi se dostavi pismenoj formi kad i kako. Hvala.

Predsjedavajući:

zahvaljujemo uvažena ministrice Sofić. Imamo pitanje kada će biti spreman materijal za tematsku sjednicu sa poteškoćama u razvoju, koliko se sjećam kolegica Dizdarević. Uvažena ministrica Bogunić.

Ministrica Zineta Bogunić:

Uključeno je. Hvala vam. Materijal u vezi sa tematskom sjednicom za inkluziju je potpuno spreman. Što se tiče Ministarstva obrazovanja ali morate znati da je to interdisciplinarna tema u kojoj bi trebali da se uključe i Ministarstvo za socijalna pitanja i Ministarstvo zdravstva. Što se nas tiče mi smo potpuno spremni i mi smo mogli i danas to izlagati. Nismo dobili materijale od ova dva Ministarstva sva, nismo dobili čak ni predstavnike u tu radnu grupu ali mi možemo sami uraditi puno toga i uradili smo ustvari gotovo sve u saradnji sa nevladinim sektorom i u saradnji sa centrima za djecu sa posebnim potrebama. Evo to je moj odgovor.

Predsjedavajući:

Zahvaljujem uvažena ministrice. Pošto nemamo više prijavljenih za odgovore. Imamo zastupnicu Šahman Bilsena.

Poslanik/zastupnik Bilsena Šahman:

Ja sam imala usmeno pitanje stav vezano za ekskurzije i on line nastavu ukoliko većina djece bolesna.

Ministrica Zineta Bogunić.

Mi smo jučer obavili anketiranje svih škola. Dakle nazvali smo sve škole u Kantonu Sarajevo sve osnovne i srednje škole da pitamo na osnovu nekih tako poluinformacija iz medija ili od roditelja koliko je naših učenika bolesno. Ni u jednom odjeljenju nema više od pet do šest na osnovu jučerašnje ankete. Rekli su nam direktori ili sekretari škola da je taj broj recimo u petak bio veći, međutim jučer u ponedjeljak on se znatno smanjio. Mi planiramo ukoliko bude veliki broj učenika odsutan on line nastavu. Ali uz te bolesne učenike moraju biti i roditelji a trebaju biti roditelji od prvog do četvrtog i one zdrave djece u kući, tako da i to je jedno poteško tehničko pitanje, ali mi ćemo se svakako prilagoditi svemu onome što nam iz Ministarstva zdravstva preporuče. Naime, mi smo imali zahtjev direktora Domova zdravlja da naši učenici ne trebaju tražiti ispričnice do 8 dana da ostaju kući. Mi smo iz Ministarstva odgovorili da nam je to prevelik ne zbog opravdavanja, nego zbog toga da pogrešno nas ne shvate roditelji da djecu ne vode po osam dana u DZ jer oni kažu su pretrpani. Ja razumijem da imaju malo pedijatra ali ćemo slijediti dakle sve upute Ministarstva zdravstva i sve upute ovog kriznog štaba. Ja želim da vas upoznam da mi je prije pet minuta direktor jedne škole poslao mail u kojem me moli da vas obavijestim da ne bi došlo do pogrešnih interpretacija, panika u javnosti, da je stigao sa ekskurzije sa dva nastavnika i 12 učenika iz Italije. Da su slobodno prošli sve, da su se prijavili našoj epidemiološkoj službi. Da su svi uvjetno rečeno u kućnoj izolaciji i da niko, samo je direktor imao temperaturu. On smatra da je to od premora, da sada nema. Ostali su u toj kućnoj izolaciji. Ovo govorim javno da ne bi došlo do panike i do bilo kakvih. Znao kako su skloni ljudi da manipuliraju time, počnu da se plaše. Nestat će nam sve sa polica. Jučer su izašli snimci na portalima kako u Milanu nema na policama čak ni jedna konzerva. Evo to je motiv moga javljanja. Zastupnice Šahman jesam li odgovorila? Stav za ekskurzije ovisit će o tome da li će neko tražiti da ide u zemlje koje su krizne. Mi ćemo to dogovoriti sa Vijećem roditelja i onda ćemo u dogovoru s njima donositi odluke. U ovakvoj situaciji mislim da trebamo, pod a) voditi računa o tome šta Ministarstvo zdravstva Kantona, Federacije kaže i mi ćemo se tome prilagođavati. Dakle naše odluke će ovisiti od uputa Ministarstva zdravstva i od Vijeća roditelja.

Predsjedavajući:

Zahvaljujem uvažena ministrice. Riječ ima uvaženi ministar Katica.

Ministar Admir Katica:

Hvala lijepo predsjedavajući. Lijep pozdrav vama, lijep pozdrav dopredsjedavajućim, uvaženim zastupnicima Skupštine Kantona Sarajevo, i posebno lijep pozdrav građanima

Kantona Sarajevo. Pitanje uvaženog zastupnika Amela Mekića se odnosilo na jednu konkretnu operativnu informaciju koju smo mogli vidjeti, odnosno svi građani su mogli vidjeti na određenim društvenim mrežama, da se jedan zastupnik pojavljuje u određenoj situaciji koja jeste potencijalno inkriminirajuća, i sadržina takve objave na društvenoj mreži u kriminalističkoj teoriji i praksi, pa i u pravnoj teoriji predstavlja indicionalnu informaciju koja predstavlja temelj za kriminalističko istraživanje određenog događaja. Govorim uopćeno teorijski a i policijska praksa govori da je takva praksa jedina ona koja je ispravna i moguća. Međutim, u ovome konkretnom slučaju ja ću zamoliti da se uputi jedan dopis Upravi policije MUP-a Kantona Sarajevo i Kantonalnom Tužilaštvu Kanton Sarajevo kako bi se dobila ova informacija i kako bi Skupština Kantona Sarajevo i uvaženi zastupnik dobili pravu informaciju o eventualnoj inkriminirajućoj osnovi i određenim postupcima kako Tužilaštva tako i policije u kriminalističkom istraživanju ovoga događaja. Hvala vam puno.

Predsjedavajući:

Hvala vam uvaženi ministre. Obzirom da smo primili veliki broj inicijativa o kojima treba da se izjasnimo, dajem pauzu 15 minuta kako bi se klubovi mogli dogovoriti o glasanju. Nastavak sjednice u 11,55.

NASTAVAK NAKON PAUZE

Predsjedavajući:

Predlažem da nastavimo s radom i da krenemo sa izjašnjavanjem o pojedinim inicijativama odnosno zaključcima. Molim zastupnike svakako odnosno službu da pozove zastupnike kako bi mogli nastaviti.

Dobio sam informaciju kolegica Admela Hodžić da je povukla svoj prijedlog zaključka tako da se nećemo izjašnjavati o istom.

Predlažem da krenemo redoslijedom ovako kako smo to i pripremili.

Prvi je uvaženi zastupnik Vreto podnio inicijativu izmjene i dopune Odluke o uplati sredstava za realizaciju usluga Ministarstva za obrazovanje, nauku i mlade i budžetske korisnike iz nadležnosti Ministarstva (Službene novine Kantona Sarajevo 24/17, 19/19 strana 22), Prijedlog za izmjene i dopune Odluke u Članu 2, stav (3) pod d, e i g :

d) registracija autoškole za poslove osposobljavanja iz poznavanja propisa o sigurnosti saobraćaja na putevima2.000 KM umanjiti za 1.700KM na iznos od 300 KM

e) registracija autoškole za poslove osposobljavanja iz upravljanja motornim vozilom B kategorije i odgovarajuće potkategorije5.000 KM umanjiti za 4.300 na iznos od 700 KM

g) registracija autoškole za poslove osposobljavanja iz poznavanja propisa o sigurnosti saobraćaja na putevima i upravljanja motornim vozilom B kategorije i odgovarajuće potkategorije.....7.000 KM umanjiti za 6.000 na iznos od 1.000 KM

Otvaram glasanje. Zatvaram glasanje. Molim rezultate. ZA JE GLASALO 34 ZASTUPNIKA, PROTIV I SUZDRŽANIH NIJE BILO. KONSTATUJEM DA JE INICIJATIVA UVAŽENOG ZASTUPNIKA VRETE DOBILA POTREBNU VEĆINU I IDE U PROCEDURU.

Uvažena dopredsjedavajuća Kristić je podnijela Zaključak:

- Obavezuje se Skupština Kantona Sarajevo da u roku do 6 mjeseci održi tematsku sjednicu u vezi sa stanjem u vodozaštitnoj zoni "Sarajevsko polje";
- Obavezuje se Vlada Kantona Sarajevo i resorna ministarstva da na vrijeme pripreme cjelovitu informaciju o stanju u vodozaštitnoj zoni "Sarajevsko polje";
- Obavezuje se KJKP "Vodovod i kanalizacija" da Skupštini Kantona Sarajevo dostavi cjelovitu informaciju o poduzetim aktivnostima na zaštiti unutar vodozaštitne zone "Sarajevsko polje", kao i kopije dokumenata-akata upućivanim drugim javnim organima po ovom pitanju u proteklim godinama;
- Obavezuju se Općina Ilidža, Općina Trnovo da za tematsku sjednicu pripreme cjelovitu informaciju o stanju unutar vodozaštitne zone "Sarajevsko polje" iz svoje nadležnosti, a naročito o aktivnostima općinskih inspekcija;
- Obavezuje se Skupština Kantona Sarajevo da u konsultaciji sa Vladom i resornim ministarstvima, kao i sa Univerzitetom u Sarajevu i ostalim stručnim institucijama na tematsku sjednicu pozove što je moguće više stručnjaka uz molbu da pripreme kratki materijal u kojem bi izložili svoje stručno viđenje situacije o stanju vodozaštitne zone "Sarajevsko polje";
- Obavezuje se Skupština Kantona Sarajevo da u saradnji sa resornim ministarstvom na tematsku sjednicu pozove stručna lica koja su radila na izradi "Elaborata zaštite izvorišta vode za piće Sarajevsko polje".

Uvažena zastupnica Kerla je imala vjerovatno neku dopunu po ovom pitanju. Uključite zastupnicu Kerlu.

Poslanik/zastupnik Bibija Kerla:

Demokratske fronte vrlo rado podržavamo inicijativu s tim što se u prvoj alineji gore stavlja umjesto dva, šest mjeseci, s obzirom da imamo izuzetno naporan period pred nama, tako da stavimo šest mjeseci umjesto dva mjeseca.

Predsjedavajući:

Zahvaljujem. Uvažena zastupnice Kerla već je dopredsjedavajuća Kristić izmijenila prijedlog i stavili smo do 6 mjeseci. Predlažem da se izjasnimo o prijedlogu zaključka uvažene dopredsjedavajuće Kristić.

Otvaram glasanje. Zatvaram glasanje. Molim rezultate. ZA JE GLASALO 35 ZASTUPNIKA, PROTIV I SUZDRŽANIH NIJE BILO. KONSTATUJEM DA JE ZAKLJUČAK DOBIO POTREBNU VEĆINU.

Uvažena zastupnica Bišćević-Tokić Jasmina je podnijela Zaključak:

I

1. Zabranjuje se Vladi Kantona Sarajevo i resornim ministarstvima davanje saglasnosti za prijem u radni odnos uposlenika na određeno i neodređeno vrijeme u organima uprave Kantona Sarajevo, zavodima, direkcijama, agencijama, upravnim organizacijama, pravnim licima s javnim ovlaštenjima na teritoriji Kantona Sarajevo, javnim preduzećima i javnim ustanovama čiji su osnivači Kanton, te u privrednim subjektima u kojima Kanton učestvuje sa 50% ukupnog kapitala.

2. Obavezuju se javni subjekti iz tačke 1. Zaključka da ponište javne konkurse za prijem u radni odnos koji su u toku, kao i da obustave prijem u radni odnos bez javnog konkursa, a sve prema ranije dobivenim saglasnostima nadležnog organa.
3. Zabranjuje se javnim subjektima iz tačke 1. Zaključka donošenje novih ili izmjenu i dopunu postojećih pravilnika o unutrašnjoj organizaciji i sistematizaciji radnih mjesta ili drugih akata kojima se reguliše pitanje sistematizacije radnih mjesta. Kao i interna premještanja zaposlenika unutar ustanova, preduzeća, organa uprave i ministarstava.
4. Obavezuju se Vlada Kantona Sarajevo, nadzorni i upravni odbori, ovisno o nadležnosti, da ponište konkursne procedure i obustave dalju proceduru izbora i imenovanja direktora i članova Uprava javnih subjekata iz tačke 1. Zaključka, koji su u toku.

II

Zaključak stupa na snagu odmah.

Bila je korekcija kolegice Tokić. Znači mijenja se i sada glasi „Zaključak stupa na snagu odmah”.

Otvaram glasanje. Zatvaram glasanje. Molim rezultate. ZA JE GLASALO 19, ZASTUPNIKA, PROTIV 14 I SUZDRŽANIH 2. KONSTATUJEM DA JE PREDLOŽENI ZAKLJUČAK USVOJEN.

Zastupnik Samir Suljević:

1. Obavezuje se Ministarstvo unutrašnjih poslova da u saradnji sa Ministarstvom prostornog uređenja građenja i zaštite okoliša, putem upravnika zgrada obavijesti etažne vlasnike o novoj zakonskoj obavezi nabavke protupožarne opreme, shodno članu 25. stav (1) Zakona o zaštiti od požara i vatrogastvu ("Službene novine F BiH" 64/09).
2. Obavezuju se upravnici koji obavljaju poslove upravljanja i održavanja zgrada da podatke o stanju protupožarne opreme dostavljaju Civilnoj zaštiti Kantona Sarajevo, koja ima zadatak da ih objedinjava i obrađuje.
3. Obavezuje se Ministarstvo unutrašnjih poslova, Ministarstvo prostornog uređenja, građenja i zaštite okoliša, Civilna zaštita Kantona Sarajevo, i upravnici koji obavljaju poslove upravljanja i održavanja zgrada na području Kantona Sarajevo da Skupštinu Kantona Sarajevo obavijeste o sprovedbi ovih zaključaka do 30.06.2020. godine ili prije ukoliko su u mogućnosti.

Otvaram glasanje za predložene zaključke uvaženog zastupnika Suljevića. Zatvaram glasanje. Molim rezultate. KONSTATUJEM DA JE GLASALO 32 ZASTUPNIKA ZA, PROTIV I SUZDRŽANIH NIJE BILO. ZAKLJUČCI SU USVOJENI.

Uvažena zastupnica Srna Bajramović Segmedina je predložila zaključke:

1. Obavezuje se Kantonalna uprava za inspekcijske poslove da izvrši inspekcijski nadzor nad primjenom Zakona o prostornom uređenju Kantona Sarajevo prilikom donošenja Odluke o izmjenama i dopunama Odluke o pristupanju izradi izmjena i dopuna Regulacionog plana "Gradski centar Marijin Dvor za lokalitet Kvadrant "B" usvojenog 24.04.2019. godine.
2. Obavezuje se Kantonalna uprava za inspekcijske poslove da naročito provjeri provedbu člana 34. stav (3) Zakona o prostornom uređenju Kantona Sarajevo ("Službene novine Kantona Sarajevo" br.:24/17) prilikom donošenja Odluke o pristupanju izradi izmjena i dopuna Regulacionog plana "Gradski centar Marijin Dvor

za lokalitet Kvadrant "B" usvojenog 24.04.2019. godine, kojom se propisuje obaveza izrade Strateške procjene uticaja na okoliš prilikom izrade planskih dokumenata što uključuje i izmjene i dopune regulacionih planova.

3. Obavezuje se Grad Sarajevo, Ministarstvo prostornog uređenja, građenja i zaštite okoliša, kao i Kantonalna uprava za inspekcijske poslove da u roku od mjesec dana obavijesti Skupštinu Kantona Sarajevo o poduzetim aktivnostima vezanim za gore navedene zaključke.

Otvaram glasanje. Molim rezultate. ZA JE GLASALO 35 ZASTUPNIKA, PROTIV I SUZDRŽANIH NIJE BILO. KONSTATUJEM DA SU PREDLOŽENI ZAKLJUČCI USVOJENI.

Uvaženi zastupnik Stojanović je podnio dvije inicijative pa ćemo se morati izjasniti pojedinačno o objema.

Prvi Zaključak:

1. Zadužuju se Ministarstvo prostornog uređenja, građenja i zaštite okoliša i Zavod za planiranje razvoja Kantona Sarajevo, da na osnovu zaključaka i preporuka sadržanih u "Studiji o urbanim ventilacionim koridorima i uticaju visokih zgrada" ubrzaju pripremu Odluke o izmjenama i dopunama Odluke o zaštiti i poboljšanju kvaliteta zraka u Kantonu Sarajevo.
2. Zadužuju se nosioci pripreme i izrade planske dokumentacije (Grad, općine i Zavod za planiranje razvoja Kantona Sarajevo), da prilikom donošenja nove, odnosno izmjena i dopuna važeće planske dokumentacije, kao i planova čija je izrada u toku, provode zaključke i preporuke sadržane u "Studiji o urbanim ventilacionim koridorima i uticaju visokih zgrada", usvojenoj od strane Vlade Kantona Sarajevo, kao i uslove koje je potrebno poštovati, prema važećem Urbanističkom planu Grada Sarajeva od 1986-2015. godine (kao planu višeg reda), donesenom 1990. godine od strane Skupštine Grada Sarajeva, a čiji prečišćen tekst je 1999. godine utvrdila Zakonodavno-pravna komisija Skupštine Kantona Sarajevo.

Otvaram glasanje. Molim rezultate. ZA JE GLASALO 35 ZASTUPNIKA, PROTIV I SUZDRŽANIH NIJE BILO. KONSTATUJEM DA SMO USVOJILI PRIJEDLOGE ZAKLJUČAKA UVAŽENOG ZASTUPNIKA STOJANOVIĆA.

Uvaženi Stojanović je podnio još novih pet zaključaka:

1. Zadužuje se Pravobranilaštvo Kantona Sarajevo, Uprava za imovinsko-pravne i geodetske poslove Kantona Sarajevo, Ministarstvo pravde i uprave i Ministarstvo prostornog uređenja, građenja i zaštite okoliša, da analiziraju i daju primjedbe i prijedloge na Nacrt Zakona o građevinskom zemljištu Federacije Bosne i Hercegovine vodeći računa o interesima i zaštiti imovine Kantona Sarajevo.
2. Zadužuje se Pravobranilaštvo Kantona Sarajevo da pripremi informaciju i objedini dostavljene primjedbe i prijedloge u skladu sa zaduženjima iz tačke 1., te istu u formi radnog materijala dostavi Skupštini najkasnije u roku od 15 dana od donošenja ovog zaključka.
3. Zadužuje se Kolegij Skupštine, da razmotri i utvrdi termin održavanja tematske sjednice na kojoj će se razmatrati odredbe Nacrta Zakona o građevinskom zemljištu

Federacije Bosne i Hercegovine sa ciljem zaštite imovine i interesa Kantona, vodeći računa o rokovima datim za javnu raspravu.

4. Zadužuje se Služba za skupštinske poslove da blagovremeno uputi poziv za prisustvo sjednici predlažaču navedenog Nacrta zakona - Federalnoj upravi za geodetske i imovinsko-pravne poslove.
5. Zadužuje se Pravobranilac Kantona Sarajevo i direktori: Uprave za imovinsko-pravne i geodetske poslove Kantona Sarajevo, Zavoda za izgradnju Kantona Sarajevo, Zavoda za planiranje Kantona Sarajevo, Direkcije za puteve Kantona Sarajevo, Fonda Kantona Sarajevo za izgradnju stanova, Kantonalnog stambenog fonda, da prisustvuju navedenoj sjednici ili da obezbijede prisustvo ovlaštenog lica.

Otvaram glasanje za predložene zaključke uvaženog zastupnika Stojanovića. Molim rezultate. ZA JE GLASALO 34, PROTIV I SUZDRŽANIH NIJE BILO. KONSTATUJEM DA SU PREDLOŽENI ZAKLJUČCI USVOJENI.

Inicijativa Mirze Čelika da se,

odnosno podnosim inicijativu za Izmjenu Odluke o proglašenju 5. februara Danom sjećanja na sve stradale građane Grada Sarajeva u periodu opsade 1992.1995. godine. Cijenim da spomenutu odluku treba izmijeniti u nazivu i daljem tekstu tako da glasi:

Odluka o proglašenju 5. februara Danom sjećanja na sve ranjene i ubijene građane građane Grada Sarajeva od strane agresora u periodu opsade 1992.-1995. godine.

Predlažem da Skupština podrži ovu inicijativu te da nakon izjašnjavanja ova inicijativa se uputi Komisiji za obilježavanje, čuvanje i njegovanje historijskih događaja i ličnosti Skupštine Kantona Sarajevo u dalju proceduru kako bi sačinila novi prijedlog ove odluke i dostavila Skupštini na razmatranje i usvajanje.

Otvaram glasanje. Molim rezultate. ZA JE GLASALO 35, PROTIV I SUZDRŽANIH NIJE BILO. KONSTATUJEM DA JE USVOJE PRIJEDLOG INICIJATIVE ODNOSNO ZAKLJUČKA ZASTUPNIKA ČELIKA.

Imamo zastupničku inicijativu uvaženog zastupnika Nikšića, ako imate potrebe da obrazložite ili da pročitam pa da se izjasnimo o njoj.

Poslovnička intervencija uvaženi zastupnik Dević.

Poslanik/zastupnik Mahir Dević:

Dva pitanja, prvo jel potpisan ovaj ugovor? Drugo jel se Skupština o tome izjasnila već? Ukoliko je oboje to bilo ova inicijativa nije u skladu s Poslovnikom mi se o njoj ne možemo izjašnjavati danas.

Predsjedavajući:

Ja se izvinjavam, tek smo dobili odluku pa da pročitamo. Svakako trebamo pročitati pa ćemo otvoriti ako treba raspravu pa ćemo se o njoj i izjasniti.

Zastupnička inicijativa uvaženog zastupnika Nikšića.

Da se Skupština Kantona Sarajevo danas izjasni da Vlada Kantona Sarajevo dostavi novi materijal Skupštini kojim će se staviti van snage Odluka o davanju saglasnosti za potpisivanje Ugovora o kupoprodaji nekretnina neposrednom pogodbom u skladu sa članom 363 stav 3) Zakona o stvarnim pravima FBiH u svrhu oblikovanja građevinske parcele A3 na lokalitetu Marin Dvor koja je razmatrana na 15 Radnoj sjednici Skupštine Kantona Sarajevo.

Mislim da ovo u obliku inicijative ili zaključka kolega Nikšiću, ja se izvinjavam, molim vas, mislim da se o ovome Skupština ne bi trebala izjašnjavati. Poslovnička odredba je jasna. Možete pokrenuti inicijativu prema Vladi da nam Vlada dostavi informaciju neki drugi akt kojim traži povlačenje te odluke, niti ste vi predlagači te odluke. Jedino Vlada je mogla da dostavi kao dopunu odluke o izmjeni odluke. Ili vi da pokrenete kroz zastupnička pitanja i inicijative prijedlog izmjene odluke ili dopune odluke kojim je donesena pa da se Skupština izjasni. Mislim da ne bi trebali da se izjašnjavamo. Mislim da ćemo napraviti nešto što nije u skladu sa Poslovnikom svakako. Kolega Nikšić hoćete li povući ili da uputimo ovu inicijativu Vladi pa da se Vlada očituje pa da dobijemo informaciju od njih.

Poslanik/zastupnik Damir Nikšić

Da idemo s tim da Vlada pošalje informaciju da počnemo razmatrati to. Šta vi savjetujete?

Predsjedavajući:

Nema potrebe da se izjašnjavamo. Znači vi ste uputili inicijativu i mi ćemo to svakako proslijediti Vladi na očitovanje.

Poslanik/zastupnik Damir Nikšić:

OK. onda u narednim nekim epizodama. Dobro. Hvala.

Predsjedavajući:

Obzirom da smo iscrpili prvu tačku dnevnog reda, predlažem da krenemo na drugu radnu tačku a to je:

AD – 2.

- a) INFORMACIJA O REALIZACIJI MJERA ZA SANACIJU I REORGANIZACIJU KJKP „GRAS“ D.O.O. SARAJEVO;
- b) INFORMACIJA O ZAGAĐENJU ZRAKA U KANTONU SARAJEVO.

a) Informacija o realizaciji mjera za sanaciju i reorganizaciju KJKP „GRAS“ d.o.o. Sarajevo

Molim predstavnika Predlagača da podnese uvodne napomene. Direktore izvolite, samo ćete se predstaviti da bi imali radi stenograma.

v.d. Direktor GRAS-a Jakub Kubur: UVODNO IZLAGANJE

Predsjedavajući:

Uvaženi direktore ja bih vas lijepo molio ako možete da se napijete vode, zaista ne razumijemo šta govorite.

v.d. Direktor GRAS-a Jakub Kubur:

Ne mogu, neće pomoći a evo pokušat ću da vas poslušam.

Predsjedavajući:

Možete zaista skratiti, mi imamo materijale smo dobili svakako. Poslovnička intervencija uvažena zastupnica Kerla. Izvolite.

Poslanik/zastupnik Bibija Kerla:

S obzirom da se direktor ne osjeća dobro ja mislim a mi smo dobili materijale, pa najbolje bi bilo da mi postavljamo pitanja a da direktor odgovara da se suzdrži svega onoga što bi trebalo da da u izlaganju jer imamo već u materijalu sve to, s obzirom da je direktor hasta.

Predsjedavajući:

Zahvaljujem uvažena zastupnice Kerla. Ako se vi slažete da nema potrebe za uvodnim napomenama, ja bih vas lijepo molio direktore da sjedete evo svakako ćemo kroz dalji rad imati priliku da vas čujemo.

Da li predstavnici radnih tijela žele riječ? Ima li pitanja? Hajte direktore vi sjedite. Direktore ja bih vas lijepo molio samo da zapisujete pitanja pa ćete naknadno odgovori. Uvažena zastupnica Hodžić Admela.

Poslanik/zastupnik Admela Hodžić:

Evo ja ću samo kratko postaviti par pitanja gospodinu direktoru. Prije nekoliko dana imali smo jedan radni sastanak u Hadžićima sa načelnikom općine gdje su dogovoreni neki koraci, neke aktivnosti u vezi prijevoza koji već duže vrijeme nemamo za učenike srednji i osnovnih škola a napomenut ću vas da sam dobila informaciju ove godine da je za prvo polugodište izostanci su u osnovnoj školi u Tarčinu oko 2000 izostanaka ima zbog prijevoza a u OŠ u Pazariću ima oko 1000 izostanaka. Ja sam prije ove sjednice dobila neka pitanja od učenika srednje škole iz Hadžića ali mislim da nema potrebe da ih postavljam ovdje sada. Ja molim samo direktora da nam kaže koji su koraci poduzeti do sada u vezi sastanka koji smo imali u općini Hadžići prije nekoliko dana. Hvala.

Poslanik/zastupnik Senad Hasanović:

Zahvaljujem predsjedavajući. Pa evo s obzirom da se i u Izvještaju pominje nabavka rabljenih zglobnih trolejbusa a i da smo u medijima, odnosno na određenim portalima mogli u proteklom periodu čuti vrlo zabrinjavajuće podatke, ja ću zamoliti direktora ako je u prilici da nam da neka pojašnjenja. Prije svega da li je tačno da firma preko koje su nabavljeni trolejbusi duguje više od 465.000 KM Grasu? D ali je to tačna informacija? D al je tačno da su kod nabavke prvih sedam trolejbusa od istog dobavljača uočeni nedostaci odnosno da li je tačno da se zaključkom komisije za prijem vozila konstatuje da je od četiri tada pristigla vozila, pokrenuto samo jedno, te nakon otvaranja zaštitnih krovnih poklopaca utvrđeno prisustvo velike količine korozije koja je napala elektronske upravljačke i pretvaračke ploče? Sljedeće pitanje, da li je u ovom trenutku svih 14 vozila u voznom stanju i da li se svih 14 vozila kreće gradskim ulicama? I posljednje pitanje da li ste upoznati sa carinskim ispravama gdje se navodi da je cijena vozila oko 11.000 KM po komadu? Hvala.

Poslanik/zastupnik Zvonko Marić.

Zahvaljujem predsjedavajući. Evo kolega Hasanović je manje više postavio pitanja koja sam i ja želio postaviti a iz razloga što se i medijima ili špekulira ili raspravlja na razne načine na temelju činjenica ili onoga što činjenice nisu. Volio bih da nam direktor, ne adresiram naravno njemu, pojasni jer koliko imam informacije, riječ je o nabavci iz 2017 godine. Ako to jeste vezano za ono budući da sam i ja postavljao pitanje za tako nešto, oko nabavke i znamo da imaju četiri podignute optužnice, da nam precizira da li je to iz tog vremena, ta nabavka, da bi otklonili neke nejasnoće koje su se pojavile u medijima i inače u kuloarima se jako puno govori o tome da je to riječ o nekoj milionskoj mahinaciji i slično. Dakle, pitam vas konkretno, ako je moguće da odgovorite, je li to vezano za četiri podignute optužnice, da znamo o čemu govorimo? Hvala vam.

Poslanik/zastupnik Bilsena Šahman:

Zahvaljujem predsjedavajući. Mi smo imali prije jedno pola godine, jednog v.d. direktora koji je došao tu nestranački, tada smo svi pohvalili izbor tog direktora Ismeta Kapu, koji je dokazani menadžer i bili smo svi sretni i zadovoljni što je neko stručan preuzeo da vrši tu dužnost. Međutim, urađena je konkursna procedura, odlukom NO je smijenjen zbog završetka konkursne procedure gdje je bilo pet kandidata. Koliko imam informacije koverta nisu ni otvorene nego je isti dan taj konkurs poništen i telefonski opet postavljen v.d. direktor. D ali je to tačno, treba mi informacija? I da li je razlog smjene bio tender za tih sedam trolejbusa koji su plaćeni firmi ENG kompani u dva iznosa od po 700.000 KM u roku od pet dana iako je rok za plaćeni bio do 30 dana? I da ta firma je dugovala i još i dan danas duguje 465.000 KM Grasu. Da je u međuvremenu smijenjen i direktor sektora trolejbusa i smijenjen šef održavanja. Da li je i ako je, zašto je to urađeno? Zahvaljujem.

Predsjedavajući:

Zahvaljujem uvaženoj zastupnici Šahman Bilseni. Obzirom da nemamo više prijavljenih, direktore ja predlažem da sjednete do ministra Štete pa da s tog mjesta odgovarate, bit će vam možda i lakše a vas ministre molim da se prijavite kako bi mogao direktor odgovoriti. Možete li uključiti ministra Štetu.

v.d. direktor Grasa Jakub:

Prvo da odgovorim uvaženoj zastupnici Hadžić. Bili smo zajedno na tom sastanku u općini Hadžići. I tada je dogovoreno, naime jeste činjenica ovo što ste vi naveli da ima problema sa prevozom a posebno učenika na općini Hadžići. Dogovorili smo naime da to stanje popravimo. Odmah smo reagovali i na neke linije gdje je bilo moguće uveli smo umjesto kombija autobuse, a malo smo uspjeli redove vožnje da posložimo da bi stanje malo popravili. U dogovoru sa načelnikom općine Hadžići, što sa zadovoljstvom ističem, dogovoreno je da će općina Hadžići pomoći Grasu u smislu nabavke neophodnih sklopova odnosno motora i mjenjača koje bi smo i ugrađivali u vozila ISUZU koja se nisu pokazala kao dobra u eksploataciji u ovim uslovima. Već prvi taj kombi, prva ta zamjena motora i mjenjača treba da bude završena ove sedmice. Našli smo još tri takva kompleta tako da očekujem da će dinamika ugradnje tih motora i mjenjača u ta vozila koja mi već imamo, malte ne ona su rashodovana, ali sam uvjeren da ćemo uspjeti da svake sedmice, eventualno svakih deset dana postavimo po taj jedan motor i mjenjač u ona vozila ISUZU koja su već otpisana. Time bi smo znatno poboljšali stanje prevoza na općini Hadžići. Ja sam svakako imao namjeru da podsjetim i načelnika posebno i da zamolim da neko iz općine Hadžići dođe da se uvjeri kojom dinamikom to sve ide. Ako ste zadovoljni tim odgovorom, OK. Uvažena zastupnica Hasanović, ako se ne varam vezano za nabavku trolejbusa. Nabavka rabljenih trolejbusa traje u više ciklusa. Od prije nekoliko godina pa evo i nešto što je započeto i završeno prošle godine. Ja sada u ovom momentu ne bih mogao da elaboriram cijeli postupak nabavke trolejbusa od 2015 godine pa na ovamo. A mogu da kažem za ovih novonabavljenih, ja ću u globalu govoriti 14 trolejbusa. Znači prvi put sedam i sada zadnjih sedam trolejbusa su nabavljeni poštujući Zakon o javnim nabavkama i poštujući sve procedure koje Zakon definisao prilikom ovakve nabavke. Mediji su pisali o tome u više navrata. Bilo je raznih komentara, međutim ja stojim na stanovištu da je zakonska procedura apsolutno ispoštovana. Kao potvrdu toga ja bih zamolio da daju kompletnu informaciju vezano za nabavku rabljenih trolejbusa u pisanoj formi u vrlo kratkom roku dostavim Skupštini Kantona Sarajevo. Te špekulacije da je od prve ture od sedam trolejbusa koji su nabavljenih, prvih sedam da tako kažem, da je korozija uradila svoje. Problema svakako ima i kod novih vozila, pogotovo kod vozila koja su rabljena. U toj mjeri nije bilo tih problema to mogu da vam odgovorno i pouzdano kažem. Ovih drugih sedam trolejbusa koji su iz ne znam kakvog razloga čekali

prijem na depo trolejbusa više od tri mjeseca u uslovima kakvi su vladali u periodu dok su to oni da kažem pod navodnicima čekali, ja ne znam koji je taj razlog bio, trolejbusi su dovezeni u depo. Uposlenici Grasa su ih osposobili, u roku od sedam dana trolejbusi su imali problem vožnje po depou, nakon narednih sedam dana bili su već na ulicama grada Sarajeva i prevozili naše sugrađane. Svih 14 trolejbusa u kojima se sada akcentira su u ispravnom stanju, u eksploataciji su, osim jednog koji je imao nezgodu i čeka se da se na njemu izvrši odgovarajuća opravka. I ove elemente bih zamolio da prihvatite da u pisanoj informaciji jasno i decidno ako treba i pojedinačno iskažemo Skupštini Kantona Sarajevo. Uvaženi zastupnik Marić Zvonko, pitao je da li su to nabavke iz 2017 godine i da li je to vezano za četiri optužnice koje su podignute. Ja bih zamolio uvaženog zastupnika evo da ga upitam ako je slobodno, nikakve optužnice vezano za nabavku trolejbusa nisu podignute. Da nije slučajno došlo do permutacije da je u pitanju nabavka autobusa na zemni gas? Čujem, nisam siguran, da tu ima nekih istražnih radnji u tom pogledu. Ja ću još provjeriti ove navode uvaženog zastupnika Zvonka Marića u istom ovom izvještaju Skupštini Kantona Sarajevo koji sam predložio bit će i to jasno i decidno navedeno. Uvažena zastupnica Šahman Bilsena pita me vezano za konkurs za izbor i imenovanje generalnog direktora Grasa, taj konkurs jeste, to mi je poznato, bio je raspisan. Komisija koja je bila imenovana nije evo dobro ste kazali, ni otvarala te koverta koje su dostavljene po tom konkursu, ja razlog za to stvarno ne znam. Mogu da provjerim od sekretara preduzeća kako je tekla ta procedura i razlog zašto je došlo do praktično poništenja toga konkursa. Ako ima još neko pitanje ili potrebno neko pojašnjenje vezano za ovo pokušat ću.

Predsjedavajući:

Zahvaljujemo direktore. Nezadovoljstvo odgovorom vjerovatno uvaženi zastupnik Marić. Izvolite.

Poslanik/zastupnik Zvonko Marić:

Zahvaljujem predsjedavajući. Direktore zahvaljujem na pojašnjenju. Ja nisam vama adresirao kao što sam u samom izlaganju rekao, odnosno postavljajući pitanja. Ni u jednom trenutku nisam govorio o trolejbusima, ja sam govorio o vozilima i znam tačno o kojim tužbama. Ako niste informirani vezano je za Kopeks Junuzović u TK. I te smo imali snimke od policije ta vozila koja su se prepravljala za potrebe Grasa, inače je riječ o turističkim vozilima. I mi imamo ako hoćete i video snimak, i ako vam zatreba savjetnik, rado bih vam se stavio na raspolaganje vezano za tu problematiku. Ja nisam govorio o tome. Sada meni govorite kako ja permutiram nešto. Ja tačno znam šta sam postavio. Evo sada ću biti još konkretniji pa ću vam postaviti sljedeće pitanje. Za nabavku 34 plinska vozila na CNG prije dvije godine bez tendera znači o tome niko ne govori. Ja vam govorim samo o nizu stvari koje se dešavaju u Grasu u nastojanju da pomognem, i vama koji ste imenovani kao direktor da mi odgovorite na pitanja, budući da se tom problematikom ne bavite. Pa vas pitam da li ste vi spremni da kao direktor ili v.d. direktor sa ambicijom da budete sutra direktor, spremni da razgovarate i o nabavci ovih plinskih vozila, 34 njih bez tendera jer to je jedini put ka ozdravljenju tog preduzeća ukoliko se budete bavili takvim stvarima i vi i vaši suradnici hvala.

Poslanik/zastupnik Bilsena Šahman:

Nisam dobila odgovor na svoje pitanje da li je plaćeno u roku od pet dana iako je rok bio 30' znači da je Gras dobar platiša, da ima novca i da li ta firma NG kompani još uvijek duguje i dugovala je od ranije 465.000 Grasu, i zašto je smijenjen direktor sektora trolejbusa i šef održavanja i zašto je konkursna procedura obustavljena, smijenjen jedan v.d. da bi se postavio drugi v.d.

Predsjedavajući.

Zahvaljujem uvažena zastupnice Šahman. Direktore ja bih vas lijepo molio da se prijavite ili ministre Šteta možete mu pomoći. Možete dati riječ uvaženom direktoru Kuburi.

v.d. direktor Grasa Jakub Kubura.

Hvala vam uvaženi predsjedavajući. Uvaženom zastupniku Mariću samo želim da se izvinem ako je došlo do nesporazuma između nas dvojice. Ja sam rekao da nije možda došlo do permutacije. Međutim sada mi je jasno apsolutno šta ste pitali. Ja u to vrijeme nisam bio u upravljačkim strukturama Grasa ali imam informacije da se vodi istraga u Tužilaštvu Kantona vezano za način nabavke ova 34 autobusa na zemni gas od kompanije Junuzović. Bila je priprema koliko sam ja čuo, ali tu informaciju ću u potpunosti da vam dostavim, ako dozvolite da je bila i priprema da se kupi od iste kompanije određen broj minibusa, ja ne mogu sada da kalkulišem koliko je to bilo minibusa, možda 15 ili 20 i oni su bili to mi je poznato, turistička klasa vozila, što u tom momentu a ni sada nije odgovaralo. Da ne bih napravio neku grešku tokom ovog izlaganja, eto zamolio bih vas da i ovu informaciju kao i onu o nabavci ovih 15 zglobnih trolejbusa upotpunimo i dostavimo u pisanoj formi kroz jedan izvještaj ovoj Skupštini. Zamolio bih također uvaženu zastupnicu Bilsenu Šahman da iz istog razloga i ova pitanja koja su mi postavljena da ne bih kalkulisao da bi bio siguran u tačnost odgovora na isti način izvijestimo Skupštinu Kantona Sarajevo i o tome svemu. Da li je ova kompanija koja je nabavila i isporučila trolejbuse dužna Grasu ili nije dužna Grasu, ja nemam pouzdane informacije. Tako da ne bih volio sada, iskreno vam kažem kalkulisati, ja ću tu informaciju provjeriti a to što nema sada informaciju u ovom momentu ja sam sada na ovoj poziciji nekih dva mjeseca, tako da nisam baš uspio ući u sve pore i sve neke bitne stvari vezano za rad kompanije.

Predsjedavajući:

Zahvaljujem direktore. Obzirom da nemam više pitanja. Otvaram raspravu. Prvi se javio uvaženi zastupnik Hasanović Senad.

Poslanik/zastupnik Hasanović Senad.

Zahvaljujem predsjedavajući. Evo ja sam zaista spremio obimnu diskusiju želio sam puno toga kazati. Naravno odgovorima na pitanja nisam zadovoljan ali mi kao zastupniku nakon ovih odgovora sve jasno. Ja ću samo kazati da se nadam da će direktor ali i svi oni koji su uključeni sporni proces u kojem su mediji izvištavali imati znatno sadržajnije i bolje odgovore za Tužilaštvo. Ja ovim putem pozivam Tužilaštvo Kantona Sarajevo da se maksimalno uključi u ovaj predmet. Hvala.

Predsjedavajući:

Zahvaljujem zastupniče Hasanović. Obzirom da nemamo više prijavljenih. Zaključujem raspravu i konstatujem da je informacija primljena k znanju.

Prelazimo na realizaciju tačke 2 b)

b) Informacija o zagađenju zraka u Kantonu Sarajevo

Molim predstavnika Predlagača da podnese uvodne napomene. Uvaženi premijeru izvolite.

Premijer Edin Forto:

Dobar dan svima, ministar Filipović je imao smrtni slučaj i nije mogao danas doći. Informaciju imate pred sobom, u slučaju da imate pitanja, mi smo tu. Izvolite.

Predsjedavajući:

Da li predstavnici radnih tijela žele riječ? Ne žele. Ima li pitanja? Imamo pitanja, ja se izvinjavam. Uvažena zastupnica Dizdarević Neira.

Poslanik/zastupnik Neira Dizdarević:

hvala predsjedavajući. Pa evo ja ću iskoristiti priliku da postavim dva pitanja i nadam se da će mi premijer moći odgovoriti. Pitanje je kakve su bile poduzete aktivnosti Federalne uprave za inspekcijske poslove u toku epizode Uzbuna pri povećanom aero zagađenju u proteklom periodu, odnosno da li su oni odgovorili na poziv Ministarstva prostornog uređenja za pojačanom inspekcijskom kontrolom i nadzorom? I druga informacija, koje su aktivnosti kabineta premijera sa Federalnim Ministarstvom okoliša i turizma po pitanju istog problema? Toliko, hvala.

Poslanik/zastupnik Zvonko Marić:

Zahvaljujem predsjedavajući. Zaista bilo je tih epizoda zagađenja, i volio bih da mi se odgovori na pitanje koje konkretne mjere su poduzimane s obzirom da smo bili nekoliko puta u nekoliko faza najzagađeniji grad u svijetu, ili drugi ili treći. Da li su te mjere i koje su mjere konkretno poduzete, počev od priče pranja ulica itd i sve one stvari o kojima smo, zapravo mjere koje smo mi zagovarali kao zastupnici i pokretali inicijative. Ukoliko mi se može odgovoriti kako smo opet dobili negativan i jako loš rezultat kod mjerenja čistoće zraka u Kantonu Sarajevo. Volio bih da znam konkretno i da li je bilo dovoljno novaca za te mjere koje smo predlagali i da li ih novi prijedlog budžeta predviđa i u kolikoj mjeri ali s tim da budu zaista efikasni, jer znam da smo i prema istraživanju da najveće zagađenje dolazi od ložišta individualnih, i predlagali smo čak alternativu za tako nešto i u kojoj fazi je realizacija ovih mjera odnosno ako hoćete nazovite ih projekata. Hvala.

Poslanik/zastupnik Damir Nikšić:

Hvala uvaženi predsjedavajući. Jedno pitanje onako volio bih da znam da li je Vlada zadovoljna Vladom inspekcija kada se radi o ovim ložištim pošto znamo daje ugalj ispod određenog procenta sadržaja sumpora stavljen van Zakona. Pa da li su te inspekcije radile pa kakvo je zadovoljstvo Vlade radom tih inspekcija, da li građane to interesuje? Hvala.

Predsjedavajući:

Zahvaljujem zastupniku Nikšiću. Obzirom da nemamo više pitanja, premijer.

Premijer Edin Forto:

Ja mislim da ste svi svjesni da pitanje kvaliteta zraka nije dnevno političko pitanje. Dobio sam pitanje koje su sve mjere poduzete. O tim mjerama smo govorili na obiman način na prethodnim sjednicama. Ali evo reći ću vam jednu anegdotu, kada u trenutku kada smo imali sastanak sa široki sastanak sa predstavnicima Međunarodne zajednice koji iskazuju također kao i vi zabrinutost oko kvaliteta zraka u Sarajevu nabrojali smo sve projekte koji su pokrenuti, projekti koji su predviđeni u budžetu i mjere koje radimo, to su uglavnom srednjoročne i dugoročne mjere. Dobili smo odgovor jedne od ambasadorica koja je rekla da je njen glavni grad imao isti problem kao Sarajevo prije određenog vremena i da su radili sve isto što smo mi počeli raditi 30 godina zaredom. 30 godina sprovode mjere za zaštitu kvaliteta zraka i sada imaju čist zrak. Nikada nije kasno početi ali mislim da su neke ovih aktivnosti i neki projekti vrlo kasno počeli. Pri tom ne govorim ne svaljujem krivnju na prethodne Vlade, ali mislim da je problem kvaliteta zraka postao javni problem u javnosti i stalno propitivanje i vas i građana. Tek nedavno. A problem imamo već dugi niz godina. Da odgovorim na još neka pitanja. Konkretno koje su mjere i sada ću se pozvati na ovaj materijal koji ste dobili u međuvremenu, ono što je bitno da je napravljena studija za uspostavu Centra za zrak što je jedan od zaključaka jedne od prethodnih sjednica iz prošlog saziva gdje je zahtijevano da se

formira Centar za zrak, Ministarstvo okoliša je donijelo studiju i Vlada je usvojila. Centar za zrak sada može se uspostaviti. Nadam se da će budući saziv Vlade nastaviti aktivnosti na tom polju. Konkretno donijeta je studija također koja je sastavni dio jednog šireg pokušaja da se okoliš u Kantonu Sarajevo studija uticaja visoke gradnje na strujanje zraka, tzv zračne koridore. Mi smo tu studiju također usvojili na Vladi i dali neke preporuke prema Zavodu za planiranje koje u ovom trenutku su obavezujuće samo u dijelu da Zavod za planiranje mora izraditi model na osnovu rezultata ove studije a nakon toga Vlada moja Vlada ili neka buduća mogu poduzeti konkretne mjere kako bi se u planiranju posebni u strateškom planiranju kod donošenja planske dokumentacije intervencija u prostoru kako bi se rezultati ove studije mogli uključiti. Od kratkoročnih mjera, mogu vam pomenuti da od prošlog puta kada smo o ovome govorili, imali smo također na tom širokom sastanku sa Međunarodnom zajednicom a tada smo imali blokirani budžet, imali smo zahtjev da se u vrtiće JU Djeca Sarajeva isporuče prečistači zraka u trenucima kada se dešavaju epizode upozorenja i uzbune, kako bi bar oni najmlađi a koji su najosjetljivija kategorija u situacijama povišenog zagađenja, kako bi mogli udisati bolji zrak. To je naravno samo privremena mjera i nju vam navodim kao jednu koja je bila reakcija na ovo što smo imali, posebno u januaru. Da odgovorim zastupnici Dizdarević, naravno mi smo više puta pokušavali ukazati i u javnosti da samo zajedničkim djelovanjem Kantonalne i Federalne Vlade može se kvalitetnije nastupati prema ovom problemu. Nismo zadovoljni kako je radila federalna inspekcija. Dobili smo jedan federalna inspekcija za okoliš dobili smo jedan dopis u kojem oni kažu da su sve zagađivače potencijalne obišli i da nisu naišli na neka odstupanja ali mi vrlo dobro znamo, posebno u Ilijašu koji je zajedno sa mjernom stanicom Otoka, koja je uvjerljivo pokazala najviše nivoe zagađenja da se tamo nešto dešava a mi pretpostavljamo da je to iz industrije što Federalna inspekcija nije konstatovala i nije dala u javnost. Također održan je sastanak sa federalnim Ministarstvom. Ovo sada sve govorim i zadnjih par mjeseci, od zadnjeg trenutka kada smo izvještavali o ovome. I ja se nadam da vam ministar Filipović može bolje prenijeti zaključke sa tog sastanka, koji je održan na poziv ministrice Đapo. Ako sam zaboravio odgovoriti na neko pitanje, možete li mi molim vas samo pomoći.

Poslanik/zastupnik Zvonko Marić:

Zahvaljujem predsjedavajući. Premijeru iskreno mi je žao ako ste me pogrešno shvatili, možda ste zaboravili da sam ja predsjedavajući stjecajem okolnosti komisije iz ovog resora. Imali smo 20 i nešto sjednica, raspravljali smo o problemu zagađenja zraka i mislim da je sasvim logično bilo da je on postavio neka pitanja i tačno je, mi smo govorili o mjerama, ali ja sam jako bi preciziran, nedvosmislene, i dorečen tako reći, a sam rekao u kojoj fazi realizacije su te mjere jer nismo vidjeli neke očekivane rezultate. Potpuno dobronamjerno potpuno oslobođeno bilo kakvih vrsta politika. Imali smo mi konstruktivnih rasprava i meni je zadovoljstvo bilo da sam predsjedavao tom komisijom. Uvaženi zastupnici koji su bili članovi te komisije imali su zanimljive prijedloge. Druga je stvar ukoliko se komisije ili njihovo mišljenje ne uzima za ozbiljno ni Vlada ni Skupština, to je sasvim neka druga priča. Nisu obavezujuće dakle, ali to vam želim još također reći da je bilo i ja ću pokrenuti sasvim sigurno tu inicijativu, pomenut ću, možda ću biti malo i ličan, guvernerku Narodne banke Hajru Balordu koja je meni, znajući da predsjedavam tom komisijom iznijela jednu vrlo zanimljivu ideju o pravljenu tornjeva za pročišćavanje zraka. I da na neki način, to finansiraju općine zbog kriminalne izgradnje. I sada mi pričamo o tome o visokim zgradama. Pa i u onom sistemu, da su ljudi smatrali da treba praviti na tim koridorima zgrade oni bi ih i napravili. I sigurno su imali mogućnosti. Međutim oni su vodili jako puno računa o tome. I sada mi moramo iznalaziti neka rješenja ali zašto ne razmatrati tako kada je riječ i o tim stvarima. To je jedan samo u nizu prijedloga i potpuno dobronamjerno sam postavio pitanje zbog toga što smo bili.

Premijer Edin Forto:

Zastupniče Marić hvala na pojašnjenju, nisam pogrešno shvatio i nisam uzeo za zlo. Jednostavno hoću da ponovim da je rješenje kvaliteta zraka dugoročni proces i da niz stvari se mora uraditi u dugom nizu godina. I da smo kasno počeli sve to raditi. Evo da vam konkretno odgovorim, najveća mjera za zagađenje zraka koja je ugrađena u Budžet za 2020 koju ćete nadam se usvojiti uskoro je potpuna rekonstrukcija javnog prevoza u gradu. Veliki dio mjera koje se dešavaju u periodima zagađenja i uzbune ovise na funkcionalnom javnom prevozu. To možda tako ne izgleda ali to je upravo tako. Suzdržavao sam se da se ne javim na ovu prethodnu tačku kada je bilo pitanje ove nabavke trolejbusa itd. To je firma Gras koja leži na 300 miliona gubitka. I smo poduzeli ogroman broj radnji i ugradili u budžet veliki broj stvari da napokon ozdravimo javni prijevoz. Kada ozdravimo javni prijevoz puno će lakše biti kontrolisati saobraćaj i sve mjere vezane za zrak i za gužve koje nam se dešavaju. Ali to je nešto također što je dugoročna stvar. Pitali ste također za ugalj i kvalitet uglja. Ova Skupština je usvojila zaključke vezano za lagano uvođenje zabrane uglja i zamjenom nekim drugim energentima. Vlada nije još poduzela ništa po tom pitanju jer su rokovi bili par godina. Skupština je dala dvije godine. Mi nismo još stigli ništa uraditi po tom pitanju. Zastupnik Nikšić e pitao vezano za inspekcije, za individualna ložišta. Inspekcija je obilazila privredne subjekte, opominjala, izričala prekršajne kazne. Ali u kuće niko ne ulazi i to treba da znate. Individualna ložišta u smislu u kućanstvima nisu kontrolisana. I to je jedan veliki problem u Kantonu Sarajevo. Također da vam pojasnim, studija koja bi trebala tačno pokazati koji su izvori zagađenja u kom procentu su individualna ložišta, šta je od toga ugalj, šta sirovo drvo, koliko je od saobraćaja, ta studija nije napravljena iako nam je bila obećana ove godine, i možete je očekivati tek sljedeće zime. Znači primjenu bilo kojih mjera konkretno po toj studiji tek one tamo zime, na žalost zbog tendera koji su pali. Dakle žao mi je što moram reći da su ovo stvari koje se moraju raditi vrlo agresivno ali na vrlo dugi period. I drago mi je da danas možemo također o tome razgovarati kada nemamo epizodu napolju. Ali također mislim da je upravo najbolje vrijeme za raspravu o mjerama za zrak ljeto kada je najbolja situacija i kada se može pripremiti najbolje mjere i najbolja reakcija za jesen i zimu kada imamo najslabiji kvalitet. Ako ima još neko pitanje ja sam spreman odgovoriti.

Predsjedavajući:

Zahvaljujem premijeru. Izgleda da nemamo. Otvaram raspravu. Uvažena zastupnica Dizdarević Neira.

Poslanik/zastupnik Neira Dizdarević:

Hvala predsjedavajući. Ja ću kratko. S obzirom da sam imala par zastupničkih inicijativa vezano za nadzor nad pravnim licima koja vrše prodaju uglja na području Kantona Sarajevo prilikom čega sam dobila odgovor od KUIP da je utvrđeno da ni jedno pravno lice ne posjeduje dokaz, odnosno sertifikat o zadovoljavanju uslova uglja o ukupnom sadržaju sumpora iznad 1%. ne ispunjava ISO standarde čime je direktno prekršen stav član 17 odluke o zaštiti i poboljšanju kvaliteta zraka u Kantonu Sarajevo. Od strane građana sam obaviještena da ista pravna lica nastavljaju prodaju uglja. Ja ću da danas predložim Skupštini tri zaključka i zamolit ću kolege i kolegice da se izjasne o istima.

1. Obavezuje se Kantonalna uprava za inspekcijske poslove da intenzivira nadzore nad pravnim licima koja vrše prodaju uglja na području Kantona Sarajevo, kao i nad onim pravnim licima koja već imaju zabranu prodaje istog.
2. Obavezuje se Kantonalna uprava za inspekcijske poslove da nadzore vrši na sedmičnom nivou, a kod proglašenja epizode "UZBUNA" shodno Planu interventnih mjera u slučajevima prekomjerne zagađenosti zraka u Kantonu Sarajevo ("Službene novine Kantona Sarajevo" br.:44/19) da nadzore obavlja svakodnevno, shodno mogućnostima.

3. Obavezuje se Kantonalna uprava za inspekcijske poslove da o poduzetim nadzorima i utvrđenim činjenicama na sedmičnom nivou izvještavaju Skupštinu i Vladu Kantona Sarajevo.

Zamoliti ću službu da ovo podijeli, s obzirom da sam umnožila ove zaključke i da se izjasnimo o istima. Hvala.

Predsjedavajući.

Zahvaljujemo zastupnici Dizdarević. Sljedeći Nikšić Damir uvaženi zastupnik. Izvolite.

Poslanik/zastupnik Damir Nikšić:

E hvala. Ja sam isto mislio napraviti neke zaključke ali vjerujte nisam stigao. Ne znam da li se može ovako usmeno pokušati dati neki prijedlog da uđe u stenogram. Pošto smo imali sada ove istraživanja i to sve i studije u vezi ovih ventilacionih koridora, pa ja bih volio da se zaduži Vlada da donese zaključke kojima ti rezultati te studije postaju obavezni, sastavni dio prostorno planske dokumentacije. Da Zavod za planiranje napravi model isto tako i da dostavi na Vladu da se to nekako utvrdi jer non stop pravimo neka istraživanja i non stop pravimo neke zaključke i onda ih na kraju ne poštuju sami. Tako da sam mislio da ovim putem to predložim. Ne znam jel se može ovako ili moram napisati pismeno.

Predsjedavajući:

Moramo imati prijedloge zaključaka kako bi se pratio tok realizacije istih. Ja vas lijepo molio za sljedeću sjednicu ili poslanička pitanja koja su predviđena 03.03. možete u formi svakako zaključka predložiti i o njima da se izjasnimo.

Poslanik/zastupnik Damir Nikšić:

OK. hvala.

Predsjedavajući:

Zahvaljujem uvaženi zastupniče. Obzirom da nemamo više prijavljenih za raspravu zaključujem raspravu.

KONSTATUJEM DA JE INFORMACIJA PRIMLJENA K ZNANJU.

I moramo se izjasniti svakako za predložene zaključke uvažene zastupnice Dizdarević:

1. Obavezuje se Kantonalna uprava za inspekcijske poslove da intenzivira nadzore nad pravnim licima koja vrše prodaju uglja na području Kantona Sarajevo, kao i nad onim pravnim licima koja već imaju zabranu prodaje istog.
2. Obavezuje se Kantonalna uprava za inspekcijske poslove da nadzore vrši na sedmičnom nivou, a kod proglašenja epizode "UZBUNA" shodno Planu interventnih mjera u slučajevima prekomjerne zagađenosti zraka u Kantonu Sarajevo ("Službene novine Kantona Sarajevo" br.:44/19) da nadzore obavlja svakodnevno, shodno mogućnostima.
3. Obavezuje se Kantonalna uprava za inspekcijske poslove da o poduzetim nadzorima i utvrđenim činjenicama na sedmičnom nivou izvještavaju Skupštinu i Vladu Kantona Sarajevo.

Otvaram glasanje za predložene zaključke uvažene zastupnice Dizdarević. Molim rezultate.

Za je glasalo 27, protiv i suzdržanih nije bilo.

Konstatujem da su zaključci usvojeni.

Prelazimo na tačku tri:

AD – 3.

PRIJEDLOG ODLUKE O IZMJENI ODLUKE O IMENOVANJU KOMISIJE ZA IZBOR I IMENOVANJA I ADMINISTRATIVNA PITANJA SKUPŠTINE KANTONA SARAJEVO

Materijal ste dobili uz poziv za sjednicu. Molim predstavnika Predlagača da podnese uvodne napomene ukoliko je potrebno. Nema potrebe. Da li predstavnici radnih tijela žele riječ? Ima li pitanja? Uvaženi zastupnik Marjanović.

Poslanik/zastupnik Damir Marjanović:

Ja vam se zahvaljujem. Samo jedno kratko pitanje prema predlagaču. Čime se rukovodio kada je pravio sastav ove komisije da li je pitanje broja zastupnika u klubovima, odnosa skupštinske većine, manjine itd. Hvala.

Predsjedavajući:

Zahvaljujem uvaženi zastupniče Marjanović. Uvaženi zastupnik Dević koji je ujedno i predlagač.

Poslanik/zastupnik Mahir Dević:

Pa u suštini praćen je na neki način izborni rezultat stranaka. Komisija kakva je bila predložena i u prethodnom sazivu zbog ove situacije koju smo imali oko kočenja vlade, odlučili smo se na ovu opciju da idemo na ovakvu izmjenu i vodilo se računa o onom članu Poslovnika u kome se kaže da će se to poštovati u najvećoj mogućoj mjeri, kao što je i prošli put urađeno. Eto ukratko to je to.

Predsjedavajući:

Zahvaljujem uvaženom zastupniku Deviću. Otvaram raspravu. Uvaženi zastupnik Marjanović.

Poslanik/zastupnik Damir Marjanović:

Ja vam se zahvaljujem. Bit ću jako kratak bez ikakve namjere da sada mijenjamo sastav te komisije. Upravo je odgovor gospodina Devića bio onakav kakav sam očekivao. Zamolit ću vas da dobro razmislimo ako ne prilikom formiranja ove komisije ali definitivno prilikom formiranja sljedećih komisija trenutnu situaciju u Skupštini Kantona Sarajevo. Ako okrenete web stranicu vidjet ćete da imate malo više klubova tamo. U biti trenutno najbrojniji klub koji imamo je Klub NBL- Nezavisni koji ima pet članova i onda bi bilo sasvim logično da u ovoj jednoj jako važnoj komisiji imamo jednoga predstavnika tog našeg kluba. Normalno ovo govorim u ime Kluba, uz konsultacije sa svojim kolegama. A malo nas je iziritiralo da je i osoba okay je upravo članica tog kluba a koja je bila u starom sastavu trenutno više nije. Tako da bilo bi lijepo kada bi kroz ovu diskusiju došli do toga da promijenimo sastav ove komisije. Ne očekujem i neću mislim da nećemo dočekati tu utopističku ideju da se realizira. Ali definitivno ću vas zamoliti da prilikom kreiranja jer idu najave sada opet kreiranja novih saziva komisija, ipak uzmete u obzir, ponavljam još jednom da je trenutno najbrojniji klub u Skupštini Kantona Sarajevo upravo ovaj koji sam rekao Nezavisni-NBL. Hvala velika.

Predsjedavajući:

Zahvaljujem uvaženi zastupniče Marjanović. Uvaženi zastupnik Konaković ima riječ

Poslanik/zastupnik Elmedin Konaković:

Zahvaljujem predsjedavajući. Umalo nisam naletio i rekao, niste a jeste najbrojniji jer smo mi ovo iscjepkali klubove po tri člana. Tako da je Marjanović u pravu. Imam potrebu zbog ovog direktnog prijenosa i zbog javnosti da kažem svoj komentar. Prije svega potpuno normalnim smatram ovaj politički čin u kojem nova većina ima prohodnost u Komisiji za izbor i imenovanje i toj je jedna normalna politička logika kojoj se uopšte ne suprotstavljam i mislim da eto nema u njoj ništa sporno. Pošto se u javnosti ovih dana pojavljivala informacija kako smo mi stari, bivši članovi, iako evo kada izglasate danas novu mi ćemo biti bivši članovi, se stavili iznad Skupštine, derogirali smo nekakve stavove, nismo imali na to prav. Želim da kažem da smo naravno imali na to pravo, da je sve urađeno potpuno u skladu sa zakonom i želim da kažem svoje lične razloge zbog čega smo takvu stvar uradili. DF nam je ovdje predložila za člana Vlade ministra privrede Gorana Mačkića iz Banjaluke, politologa koji na pitanje da li se desio genocid u Srebrenici poslao meni dva pisma, neka javna.

Predsjedavajući.

Poslovnička intervencija uvaženi zastupnik Dević izvolite.

Poslanik/zastupnik Mahir Dević:

Zamoliti ću vas predsjedavajući da se držimo tačke dnevnog reda a ona se tiče Komisije za izbor i imenovanje a ne kandidata za ministre i Vladu. A to će biti na nekoj od narednih sjednica tada možemo o tome diskutovati.

Predsjedavajući:

Zahvaljujem uvaženi zastupniče Dević, svakako ćemo voditi računa. Uvaženi zastupniče Konakoviću, uvažena zastupnica nije se prijavila Kerla, niste se prijavili je li tako?

Uvaženi zastupniče Konakoviću ja bih vas lijepo molio da se držimo Poslovnika odnosno tačke dnevnog reda. Izvolite.

Poslanik/zastupnik Elmedin Konaković:

A vi meni kažete da nije tačka dnevnog reda to što ste uzeli za razlog našeg ne glasanja za kabinet Marija Nenadića imena koja smo mi problematizirali i koja ste vi, vidi slučaja, čak i sklonili i više nisu predmet rasprave. A ja kao sada o tome ne bih smio o tome govoriti, jer to ko biva nije tačka dnevnog reda. Evo samo mi objasnite kako nije tačka dnevnog reda razlog zbog kojeg se ova komisija koju vi imenujete mijenja, čiji sam ja bio predsjednik i nisam previše o tome javno govorio. Ali ovo je Skupština koja me je birala i želim javnosti to da kažem. Vi možete ako želite da mi to ne dozvolite, ja ću naravno to reći na neki drugi način. Razlozi zbog kojeg nismo glasali su: jer je DF predložila Gorana Mačkića, čovjeka koji negira genocid da bude ministar privrede. Vi možete prekidati koliko hoćete.

Predsjedavajući.

Uvaženi zastupniče Konakoviću Dević ima prednost, poslovnička intervencija izvolite.

Poslanik/zastupnik Mahir Dević.

Znači predsjedavajući ponovo poslovnička intervencija kada budemo razgovarali o imenima za sastava Vlade tada se na ovakav način to može razgovarati. Tačka dnevnog reda se zove Izmjena komisije za izbor i imenovanja. Sa vrlo jasno predloženim imenima. Ja ću vas moliti zaista da u skladu s Poslovníkom se držimo dnevnog reda

Predsjedavajući:

Zahvaljujem uvaženi zastupniče Deviću. Konaković ima riječ ponovo.

Poslanik/zastupnik Elmedin Konaković.

Ja govorim razlozima zbog koji nismo podržali prijedlog i komisija nije imala potrebnu većinu. Ja ne mogu reći razlog ako ne objasnim njegovu suštinu i ne kažem svoj lični stav. Evo mogu ja to umotati. Jedna politička stranka predložila je jednoga kandidata koji je negirao genocid. I meni kao čovjeku savjest ne dozvoljava.

Predsjedavajući:

Ja bih vas lijepo molio da se držimo tačke dnevnog reda. Ispravka krivog navoda uvaženi zastupnik Milavica.

Poslanik/zastupnik Sead Milavica:

Zahvaljujem predsjedavajući. Bit ću vrlo kratak. Nije tačno da gospodin Mačkić, evo ne želim danas da diskutujem o tome, ali nije tačno da momak nije priznao sve ovo što navodi gospodin Konaković. Dakle nemojte molim vas da diskutujemo dalje o tome, odvest će nas ovo u potpuno nekom drugom pravcu.

Predsjedavajući:

Zahvaljujem uvaženi zastupniče. Ispravka krivog navoda zastupnica Kerla Bibija.

Poslanik/zastupnik Bibija Kerla:

Ja samo mogu da kažem da se bilo koje ime našlo na spisku da komisija ne bi dala svoje za za promjenu Vlade Kantona Sarajevo. Toliko hvala lijepo.

Predsjedavajući:

Zahvaljujem uvažena zastupnice Kerla. Riječ ima uvaženi zastupnik Konaković ali molim vas da se držite dnevnog reda.

Poslanik/zastupnik Elmedin Konaković:

Boga mi je mene sramota kao čovjeka koji sjedi u ovoj skupštinskoj sali da mi kao ljudi i da me prekidate pet puta nakon što govorim o čovjeku, mogu se korigovati ovo što govori Milavica, možda sam to pogrešno rekao, nije negirao genocid, nego na pitanje da li se desio rekao je da razmišlja kao normalni ljudi. Nije na to odgovorio i nije došao u skupštinsku salu da nam na to odgovori. Vi me kao pa ne moram uopšte titulirati, prekidate šesti put.

Predsjedavajući.

Poslovnička intervencija. Ja u skladu s Poslovnikom uvaženi Konakoviću moram dati poslovničku intervenciju uvaženom zastupniku Deviću izvolite.

Poslanik/zastupnik Mahir Dević:

Predsjedavajući ja ne znam koliko puta treba da tražim poslovničku intervenciju za kršenje Poslovnika, sedam puta, 18, 99, samo mi recite da znam odmah da 99 puta pritisnem. Znači ponavljam još jednom tačka dnevnog reda je izmjena komisije za izbor i imenovanja. Držite se tog dnevnog reda i u skladu sa vašim ovlaštenjima kao predsjedavajući Skupštine vodite tu sjednicu. Ovo su diskusije koje nam slijede, nije sporno uopšte. Ali ovo nije ta tačka dnevnog reda i imam repliku vezano za komisiju za izbor i imenovanja ali naravno kada kolega završi.

Predsjedavajući:

Zahvaljujem uvaženi zastupniče Deviću. Uvaženi zastupnik Konaković ja bih vas zaista molio da se držimo tačke dnevnog reda. Vjerovatno u narednom periodu ćemo imati tačku kada ćemo razmatrati prijedlog odluke o potvrđivanju Vlade gdje ćete imati mogućnost da kažete sve što ste do sada kazali.

Predsjedavajući:

Gospodine Čelik, ja sam Elmedin Konaković predsjedavajući aktuelni Komisije za izbor i imenovanja kojeg mijenjate. Gospodine Deviću, ja sam Elmedin Konaković. Aktuelni predsjedavajući Komisije za izbor i imenovanja koju mijenjate. Da me šest puta prekidate dok govorim o osobi koja u ovoj sali ne bi smjela izaći za govornicu i reći: da, desio se genocid u Srebrenici. Veći poraz od toga je činjenica da to radi kolega Dević, za mene kao čovjeka. I možete prekinuti 300 puta. Odgovorno tvrdim u okviru sam rasprave. Govori se o smjeni komisije koju vodim, a ja govorim o razlozima zbog kojih nismo htjeli podržati taj i druge prijedloge koji su sramotni, ali ovaj me najviše boli. Ali me još više boli reakcija mojih kolega koji me šest, evo sedam, evo osam, evo devet puta prekidaju i ne date mi da kažem razloge a vi smjenjujete upravo Komisiju koju sam lično vodio godinu dana. Čak sam korektno rekao da je to politička logika ali ste o nama vi govorili javno kako smo nezakonito zaustavili proces imenovanja i danas nas smjenjujete. Ja želim da kažem evo gore imam deset poruka svi me čekaju da to kažem u eter medijima i reći ću ne možete me to zaustaviti ali je sramotno da se ne složite sa mnom i da kažete, to je greška SF-a i to se više nikada ovdje neće desiti jer smo mi sebi dozvolili niže od

Predsjedavajući: Ispravka krivog navoda uvaženi zastupnik Milavica.

Poslanik/zastupnik Sead Milavica:

Zahvaljujem predsjedavajući. Dakle zaista evo ponavljam, gospodin Mačkić je javno priznao sve presude kako domaćih tako i međunarodnih sudova. Molim vas, nemojte ovu raspravu da koristite u politikantstvo. Nemojte da idemo dalje u ovom smjeru. Dakle to su potpuno privatni razlozi zašto je gospodin Mačkić odustao od kandidature za ministra u ovoj Vladi.

Predsjedavajući:

Zahvaljujem uvaženi zastupniče. Dat ćete riječ zaista Konakoviću ali vas molim da se držimo zaista u okviru tačke dnevnog reda, evo imat ćemo priliku da kažemo nešto poslije vjerovatno i kandidata kada bude tačka na dnevnom redu. Sada razgovaramo o Prijedlogu odluke o izmjeni odluke o imenovanju Komisije za izbor i imenovanje i administrativna pitanja Skupštine Kantona Sarajevo. I zaista molim sve zastupnike da nas vratimo u okvire ove tačke i da razgovaramo o tački koja je na dnevnom redu.

Poslanik/zastupnik Elmedin Konaković:

Predsjedavajući ja sam Elmedin Konaković predsjedavajući Komisije za izbor i imenovanja koju mijenjate na čijem sam čelu punih godinu dana i nisam glasao za sastav kabineta Marija Nenadića koji se u svome sazivu imao sporne, za nas, članove. Da mi to danas ne date da kažem, ja razumijem. Ja razumijem i vaš odnos prema ovoj temi, koji mi je danas potpuno jasan, i da gospođa Kerla može znati da mi ne bi glasali za nešto a vi to pustite da ona kaže i to mi je OK. Ali boga mi možete ovdje tehnički ispresijecati ali ne možete suštinu ovoga što ja govorim nikako zaustaviti. Jer je to najniže što nam se desilo i zato nisam kao predsjednik komisije koju mijenjate želio da glasam. I zato ni ostali članovi nisu željeli da glasaju. Ni zbog drugih imena o kojima ćemo govoriti. Evo neću previše danas govoriti. Ali nećete ostaviti u eter sliku da smo mi ovdje ko biva zaustavljali neki pozitivan proces, stali na put i ko biva kupovali vrijeme. To je najgore od svega što ste rekli ova komisija kupuje vrijeme da bi ova Vlada ostala što duže na vlasti. To vi govorite ljudi svaki dan. Ja danas ljudi imam svoje pravo kao zastupnik da kažem stvarne razloge jer ljudi gledaju i našu javnost to zanima. Za mene je to jedan od najvećih političkih poraza u životu da sam takav materijal kao predsjednik komisije koju danas mijenjate a koja je predmet vaše rasprave dobio na sto. Za mene je to najveći poraz da smo kao društvo došli u takvo stanje. I to ću govoriti dok sam živ i naravno kada budete imali imena i pitat ću te ljude i netačno je, možda jeste Milavici rekao

ali nigdje nećete pročitati ni jedno slovo o tome da je 8372 ljudi ubijeno i da zato odgovaraju ljudi koji su počinili genocid. I vi to zove politikantstvom.

Predsjedavajući:

Ja bih vas lijepo molio da se vratite i oduzimam vam riječ. Sljedeći se javio uvaženi zastupnik Čampara. Replika Dević-

Poslanik/zastupnik Mahir Dević:

Zahvaljujem predsjedavajući. To ste trebali uraditi davno ranije u smislu oduzimanja riječi.

Predsjedavajući:

Ja vam se zahvaljujem ali ja vodim sjednicu i vi ćete na sugestijama svakako vam hvala.

Poslanik/zastupnik Mahir Dević:

Replika se odnosi na sljedeću temu, ja neću ulaziti u ova politikantstva koja gospodin Konaković svakodnevno koristi u Skupštini Kantona vratiti ću se na ovaj formalni dio u kojem kaže da je komisija nešto mogla uraditi u sljedećem smislu, radi javnosti. Priča o Poslovniku i tumačenju prethodnog govornika zaista mislim da je besmislena nakon godinu dana i četiri presude Ustavnih sudova tako da u taj dio zaista neću ulaziti. Ono što je činjenica radi javnosti ovo govorim Komisija za izbor i imenovanja na bazi Poslovnika dobija sastav Vlade predložen od strane mandatar. Komisija za izbor i imenovanja nema pravo da promijeni ni jedno ime u tom kabinetu koji je predložio mandatar po Poslovniku. Također po poslovniku komisija za izbor i imenovanje je trebala dat i svoje mišljenje.

Predsjedavajući:

Poslovnička intervencija dopredsjedavajući Handžić Vibor izvolite.

Dopredsjedavajući Vibor Handžić:

Gospodine Deviću vi sada

Poslanik/zastupnik Mahir Dević:

Koji član predsjedavajući sam ja prekršio?

Predsjedavajući:

Uvaženi zastupnik Dević molim vas da se suzdržite riječ ima uvaženi dopredsjedavajući Handžić uključite Handžića molim vas.

Dopredsjedavajući Vibor Handžić:

Gospodine Deviću niste ni vi pri poslovničkoj intervenciji navodili član Poslovnika i nemojte me prekidati. Dakle pričate u replici sve ono protiv čega ste podnosili poslovničku intervenciju dakle potpuno mimo tačke dnevnog reda. Hajte bar budite sami sa sobom principijelni. Riječ ima uvaženi zastupnik Stojanović Igor. Morat ćete se uključiti ponovo, ja se izvinjavam uvaženi Stojanoviću dajte riječ Deviću, nije završio repliku.

Poslanik/zastupnik Mahir Dević.

Prije Stojanovića je Čampara bio. Komisija za izbor i imenovanja je imala pravo da da negativno mišljenje na sastav kabineta ali je morala pripremiti prijedlog odluke i uputiti da u dalju proceduru prema Skupštini Kantona Sarajevo. Komisija za izbor i imenovanja nema pravo zaustaviti imenovanje Vlade Kantona Sarajevo. Nema pravo. I to radi javnosti da se zna a to je na žalost uradila. I ovo je obrazloženje zašto je to uradila. To je druga priča. Ali ona to nema pravo. Mogla je dati negativno mišljenje, mogla je glasati 4:3 da kaže mi ne dajemo

saglasnost na ovo ali je prijedlog odluke morala pripremiti potpisati i poslati na Skupštinu Kantona Sarajevo. Evo to je ta replika o meritumu a ne o politikanstvu. Hvala.

Predsjedavajući:

Zahvaljujem uvaženi Deviću. Odgovor na repliku gospodin Konaković.

Poslanik/zastupnik Elmedin Konaković:

Ja vam garantujem da samo Dević ovako misli u ovoj sali. Garantujem i evo molim sekretara da protumači, skupštinsko radno tijelo Komisija za izbor i imenovanja donosi akt koji vam je u Poslovniku označen i zove se odluka, to nije mišljenje. To je odluka. Da bi bilo koja odluka bilo kojeg organa bila validna ona mora imati potrebnu većinu.

Predsjedavajući:

Ispravka krivog navoda uvaženi zastupnik Dević.

Poslanik/zastupnik Mahir Dević:

To nije odluka. Odluku o tome da li će takav kabinet biti imenovan donosi Skupština. To je mišljenje. Komisija razmatra, daje mišljenje priprema prijedlog odluke na bazi pristiglog prijedloga. Ne može ga mijenjati. Ni jedno ime ne može promijeniti. Znači može samo konstatovati šta je dostavio mandatar i takav sastav Vlade uputiti u dalju proceduru i nema pravo to blokirati, može glasati protiv naravno, to je njeno pravo, konstatovati u zapisnik da je ona protiv takvog sastava kabineta i protiv takvog premijera potpisati tu odluku i poslati na Skupštinu, a Skupština da konačno mišljenje o tome. To je po Poslovniku.

Predsjedavajući:

Zahvaljujem uvaženi zastupniče Deviću. Uključite Konakovića.

Poslanik/zastupnik Elmedin Konaković:

Ako Dević sebe posluša šta je sada rekao, ona priprema mišljenje, i odluku. Rekao je u jednoj rečenici, a ja vam opet tvrdim, jer zaista ovo što govori nije tačno i ne može ispraviti kriv navod neispravnim navodom. Dakle odluka nije mišljenje. Kada budete naredni put predlagali u ovoj sali Vladu znate ko će biti njen predlagač odluke, Mahir Dević ako ga danas imenujete za predsjednika komisije a to ću vas kolega podsjetiti iduće sedmice. Dakle vi ćete biti predlagač odluke o imenovanju Vlade. Ne možete dati ispravku krivog navoda na neistinit navod i zato molim da sekretar pročita.

Predsjedavajući:

Ispravka krivog navoda uvaženi Konakoviću ja bih vas lijepo molio da se držimo Poslovnika o radu Skupštine i molim vas da pustite Devića ispravka krivog navoda ima prednost.

Poslanik/zastupnik Mahir Dević:

Moram da kažem ukoliko ja budem izabran da predsjednika te komisije da sam ja predlagač te Vlade, to je potpuno netačno. Ja mogu potpisati samo taj akt koji je dostavljen kao prijedlog od strane mandatar. Mandatar je taj koji predlaže sastav Vlade. Ne predlaže to ni predsjedavajući Skupštine ni predsjedavajući komisije za izbor i imenovanja. Taj sastav Vlade predlaže mandatar. Hvala.

Predsjedavajući:

Zahvaljujem uvaženi zastupniče Dević. Molim vas uključite gdina Konakovića zastupnika.

Poslanik/zastupnik Elmedin Konaković.

A ne može to nikako uspjeti, taj pokušaj izvrtanja istina. Nije mi palo na pamet da kažem da je Dević predlagač Vlade. To bi zaista morao biti neinteligentan da bih tako nešto rekao. Predlagač će biti Dević odluke jer ovako kaže naš Poslovnik, evo da ne čekamo sekretara. U članu 204 „ Kandidat za mjesto premijera dostavlja predsjedavajućem Skupštine prijedlog kandidata za ministre i to najmanje 12 dana prije početka sjednicu Skupštine na kojoj će se vršiti izbor. E sada najvažniji dio, predsjedavajući Skupštine ovaj prijedlog odmah i bez odlaganja prosljeđuje Komisiji za izbor i imenovanja koja na osnovu njega utvrđuje prijedlog odluke o potvrđivanju Vlade Kantona Sarajevo. U potpisu ove odluke stajat će vam Mahir Dević i on će na narednoj sjednici kao uvodničar ove tačke govoriti. Osim ako nekom drugom to ne prepusti i ovo će se desiti. Ovo se ne može izbjeći. Dakle to je činjenica. Pročitajte kako se donose odluke, da bi se donijela odluka potrebna je natpolovična većina od broja članova, što je četiri. Nas četiri nismo željeli iz ovih razloga o kojima ja govorim a sramota me nas sviju da mi ne date danas da o tome govorim, i da se ne smije u Sarajevu govoriti o čovjeku koji nije spreman izaći na binu i

Predsjedavajući.

Oduzimam vam riječ uvaženi zastupniče Konakoviću. Zaista moram ispraviti krive navode vaše. Ja sam član komisije za izbor i imenovanje Mirza Čelik i sada sam član komisije. Na samoj sjednici komisije za izbor i imenovanje niko od nas nije čuo pitanje koje ste vi postavili a da je uvaženi ili premijer odgovorio na način na koji vi to interpretirate. Ja ću vas podsjetiti i evo prisjetit ćete svi zastupnici ko ji su članovi komisije iza izbor i imenovanje i administrativna pitanja na vaše pitanje da je kandidat za premijera odgovorio sljedeće nikada neće biti niko u sastavu mog kabineta koji ne prihvata činjenicu i ono sve što je doneseno a karakteriše se kao genocid. Znači nikada i niko neće biti u Vladi Marija Nenadića. O Mariju Nenadiću i o njegovom kabinetu možete sami presuditi ako ste bili upoznati sa njegovim radom, a vjerujem da jeste, možete samo zaključiti da je čovjek radio na reintegraciji Srebrenice od svog postavljenja na mjesto gdje je bio u ranijem periodu pa sve do danas. Od rekonstrukcija škola u Srebrenici, puteva i svega onoga što je tamo to urađeno. I to je zahvaljujući našem kandidatu za premijera. A ja nisam čuo da je rekao da će neko negirati genocid.

Ispravka krivog navoda Konaković.

Poslanik/zastupnik Elmedin Konaković.

Pomenuo nisam Nenadića. Niti sam uopšte govorio o tome da on jest ili nije nešto rekao. I rekao je upravo tako kako vi kažete, ali ja ga pomenuo nisam. Ali je rekao jednu neistinu. Nenadić je meni odgovarajući, rekao da je razgovarao sa ovim čovjekom i da on zna kako on razmišlja. A onda ste svi mogli vidjeti u javnosti kako taj čovjek razmišlja. I on danas obnaša funkciju direktora u Parku. I ja kada krenem o tome govoriti vi me ispresijecate sedam, osam devet puta i mislite kao time ćete vi prekinuti ovu temu. Vi njoj samo dajete onu dimenziju koju ona zaslužuje. Da smo kao društvo dotakli moralno dno. Da ne dozvoljavate da jednu takvu grešku ovdje priznamo. Ja ću to nastaviti u sali za medije a ovo ću naredni put kada ovdje bude više ljude sa kojima mogu govoriti u lice i koji to žele slušati. Hvala vam.

Predsjedavajući:

Zahvaljujem uvaženi zastupniče Konaković. Pošto smo redoslijed izgubili ja sam pisao. Uvaženi zastupnik Čampara je imao riječ pa Stojanović, Segmedina Srna Bajramović i Jakupović. Takav ćemo redoslijed.

Poslanik/zastupnik Aljoša Čampara:

Zahvaljujem predsjedavajući. Pa prije svega ja sam bio ponukan diskusijom profesora Marjanovića vezano za ove sve farse koje mi imamo inače oko Poslovnika o radu kantonalne Skupštine i iz tog razloga sam se i javio. I kod samog utvrđivanja dnevnog reda, i kod samih komisija, postavljanja pitanja da li su ove naše komisije, njihova mišljenja ili odluke da li su obligatornog ili fakultativnog karaktera, to su otprilike neke stvari koje mi stvarno moramo i radi budućnosti riješiti da imamo jasne, precizne stavove oko ovih stvari. Ja sam npr i prije imao, jednostavno dileme, promišljanja i kod samog utvrđivanja dnevnog reda. Evo npr. hipotetički za mene je nenormalno da dnevni red može utvrđivati samo Kolegij. Naravno da je Kolegij pomoćno tijelo kao što su komisije, da su to pomoćna tijela ovog skupštinskog organa. I da ta tijela pomažu u radu Skupštine, kao krovne, zakonodavne institucije. Ali ukoliko mi imamo situaciju da samo Kolegij može utvrditi dnevni red, onda hipotetički to znači sljedeće da gospoda iz recimo opozicije, bilo ko, ko želi nešto da predloži, Kolegij mu odbije to. Dakle on više nema nikad priliku i situaciju da to predloži na samom skupštinskom zasjedanju. Mislim da su ovo stvari koje mi jednostavno trebamo riješiti u ovom Poslovniku. Ali evo imat ćemo mi drugu tačku oko samog Poslovnika pa ću se javiti i na to, ali sam bio ponukan diskusijom gospodina Marjanovića vezano za klubove. Pa pogledajte

Predsjedavajući:

Poslovnička intervencija uvaženi zastupnik Stojanović.

Poslanik/zastupnik Igor Stojanović:

Dakle predsjedavajući molim vas da upozorite zastupnika Čamparu ovo uopšte nije tema, mi diskutujemo kao što ste rekli o članovima Komisije. O Kolegiju i o Poslovniku uopšte ne diskutujemo na ovoj tački, tako da vas molim da se držimo dnevnog reda. Hvala.

Predsjedavajući:

Zahvaljujem zastupniče Stojanović. Uključite Aljošu Čamparu, zastupnika a molim vas da se držite dnevnog reda odnosno tačke koja je sada u fazi rasprave.

Poslanik/zastupnik Aljoša Čampara.

Oprostite ja se stvarno držim, upravo sam rekao da je gospodin Marjanović pitao vezano za ovu komisiju koji je razlog da su odabrani baš ljudi u ovu komisiju pa me to ponukalo. I zastupnik je rekao da su oni sada najveći klub u Skupštini Kantona Sarajevo. Pa upravo hoću da skrenem pažnju, čisto dobronamjerno da smo mi došli u situaciju da cjepkamo klubove. Mi sada imamo od jednog kluba SDA tri kluba, od jednog kluba NIP-a dva kluba, došli smo u tu situaciju. Nema potrebe, uopšte da dolazimo u tu situaciju jer su to neke zloupotrebe koje se rade u Skupštini. Zašto to radimo. Zna se ko ima većinu, ko ima većinu 18 ljudi ovako dolazimo ovako u situaciju da od jednog kluba pravimo tri kluba, od jednog dva itd. Ja govorim o stvarima koje nisu dobre jednostavno za rad Skupštine. Otežavamo rad Skupštine, smiješno je da dijelimo jedan klub sada na tri da bi neko imao većinu u Kolegiju jer ispade ovako da je Kolegij Skupštine važniji od cijele Skupštine. Ja o tome govorim i hoću da dokažem da to nije tako. Da to ne može biti tako i moramo nešto raditi kod samih promjena u Poslovniku. Ali evo doći ćemo na sljedeću tačku vezano i za članstvo u samom Kolegiju, vezano za sekretara pa ću se i oko toga javiti. Hvala.

Poslanik/zastupnik Igor Stojanović:

Mada se dijelom slažem sa zastupnikom Čamparom ne mislim da je tema klubovi i Poslovnik nešto što je trenutno tačka dnevnog reda. A trenutna tačka dnevnog reda je Odluka o izmjeni odluke o imenovanju komisije za izbor i imenovanje i administrativna pitanja Skupštine Kantona Sarajevo. Dakle vrlo konkretno. Mi trenutno mijenjamo članove komisije Elmedina

Konakovića, Amru Junuzović i Mirzu Čelika, za Mahira Devića, Bibiju Kerlu i Jasminu Bišćević-Tokić koji ulaze umjesto njih u komisiju.

Predsjedavajući:

Ispravka krivog navoda uvažena zastupnica Bibija Kerla.

Poslanik/zastupnik Bibija Kerla:

Ne mijenja Bibija Kerla, bila je prije u ovoj komisiji gospodine Stojanoviću, ako niste znali.

Poslanik/zastupnik Igor Stojanović:

E izvinjavam se zastupnici Kerli, ona je znači bila. Mijenjamo Elmedina Konakovića i Amru Junuzović za Mahira Devića i Danijelu Kristić. Dakle radi se o zamjeni članova. Ja želim da diskutujem isključivo o ovoj temi, neću ulaziti u ovo formiranje klubova, niti ispravke krivih navoda niti šta se diskutovalo na sjednici, ko je protiv koga, da li je tačan navod, šta misli predloženi ministar ili o tim stvarima. Ali želim nešto da kažem o radu ove komisije. Za mene je simptomatično da članovi na komisiji koji su iznijeli određene kritike za predložene kandidate za Vladu, za Gorana Mačkića, za Teu Mušić, vrlo je simptomatično indikativno da danas nova većina mijenja baš te članove koji su kritikovali ove predložene kandidate za Vladu, a pri tome je usvojila njihove kritike i promijenila već prijedloga koji je samo prije pet dana bio tu i sada nova većina mijenja prijedlog za Vladu, uvažila kritike ovih članova i zamijenila ih. Pa zašto, ja bih volio da znam i hoće li ovo biti praksa nove većine da vi sve onog ko kritikuje i uvažite njihove sugestije, onda odlučite se i kažete ma ovi nam smetaju, u pravu su, imaju dobre kritike. Mi ćemo ih zamijeniti da možemo sada da provučemo članove koji nama odgovaraju. Izvinite molim vas, vi ste protiv kritike, neki totalitarizam u kojem želite bilo kojeg člana da imenujete koji je kopromitovan kroz javnost i kroz svaki istup. Ja mislim da nije korektno. Ja mislim da neko treba da bude tu i da može ukazati na neke stvari. Evo slažem se da promijenimo članove komisije ali valjda bi svi trebali da kažu ako nešto nije u redu sa nekim predloženim kandidatom. Dakle promijenili ste ljudi članove, mijenjate članove komisije koji su vam ukazali na loše ministre, i vi ih sada mijenjate a promijenili ste i te kandidate za ministre. Smiješno je to. Ako je ovo praksa nove većine koja će biti i u buduću i želite, šta želite da poništite bilo koga ko može da kritikuje. Ja mislim da je to izuzetno loša praksa, totalitarizam, evo vrlo često mi iz SDP dobijamo ovdje, kao nasljednici komunizma neke packe iz SDA. Znaite šta je ovo, ovo nema ni u Sjevernoj Koreji. Složite se i onda promijenite sve živom što vam se ne sviđa da možete da imenujete neke gore. Katastrofa. Hvala.

Predsjedavajući:

Zahvaljujem uvaženi Stojanović. Dević je bio prva replika Stojanoviću.

Poslanik/zastupnik Mahir Dević.

Razumijem da je pokušaj zamjene teza, politički radi predstave i radi javnosti i pravo da vam kažem ja da sam bio član te komisije za izbor i imenovanje ja vam ne bih nikada pristao na ovaj redoslijed kako ste vi uradili niti bih vam priznao da vi kao komisija imate pravo to zaustaviti. Formirana je nova parlamentarna većina, nova parlamentarna većina ima pravo da ima većinu u svim komisija, kao što je imala i prethodna, što je jedan potpuno normalan demokratski čin koji nema apsolutno nikakve veze sa tim zamjenama teza koje vi ovdje iznosite. Ono što je činjenica mi kasnimo sa imenovanjem Vlade 12 dana, a prije toga još 7, a prije toga još 15, a prije toga još 5 dana i ne znam koliko već sedmica zbog zloupotreba Poslovnika a jedna od tih je bila ova koja je urađena na komisiji za izbor i imenovanje.

Predsjedavajući:

Ispravka krivog navoda uvaženi zastupnik Konaković.

Poslanik/zastupnik Elmedin Konaković:

Nikakve zloupotrebe Poslovnika nije bilo. Skupština i njeni organi donose odluke većinom glasova izabranih. Komisija za izbor i imenovanja iz razloga o kojima smo pokušali govoriti a niste nam baš dali. Nije usvojila odluku kada neki organ nema potrebnu većinu za neku odluku ona ne može biti prosljeđena u dalju proceduru. Ovi članovi Poslovnika koje sam čitao o tome govorim. I evo u konačnici, mislim da će sekretarka morati protumačiti, kako se na koji način donose odluke i da li je ovo bilo bez učešća bilo obavezujuće. Još jedna konstatacija na izbor Vlade u komisiji u kojoj je bio kolega Dević ili vi Čelik, glasali ste protiv, kada smo birali Fortinu Vladu. Niste bili za. Niste to shvatili kao formalnost koju samo treba protočno, to će proći. Ne, ne, ne. Nego se tu izražava stav i glasa. Ako nema četiri nema odluke. Ako nema odluke nema predlagača odluke. To nije zloupotreba Poslovnika ovako kako govori Dević.

Predsjedavajući:

Replika uvaženi zastupnik Dević. Jel nastavljate svoju repliku ili replicirate Konakoviću. Replika Konakoviću druga i nemate pravo više na repliku.

Poslanik/zastupnik Mahir Dević:

Završavam da bi ova farsa bila završena sljedećom rečenicom kolega Konaković, moj prethodni govornik je četiri puta sada pod punom krivičnom, materijalnom odgovornošću kao vrhunski poznavalac Poslovnika nas ubjeđivao ovdje četiri puta da on zna Poslovnik. Kod Zakona o prijavi imovine pa ga mišljenjem oborio Ustavni sud. Kod autentičnog tumačenja Zakona o visokom obrazovanju pa ga oborio Ustavni sud. Kod Nacrta budžeta Ustavni sud se proglasio tu nenadležnim samo što smo usvojili prijedlog. Da je ušao u meritum i to bi palo. I sada konačno ovo. Ovo je peta stvar koju je napravio na komisiji za izbor i imenovanja. Niko njemu nije branio da on glasa protiv ove Vlade na toj komisiji. I treba glasati protiv nje jer je opozicija ali nije imao pravo zaustaviti proceduru imenovanja Vlade. Moramo je potpisati odluku u kojoj će reći u mišljenju da je protiv nje. Oni su zaustavili imenovanje Vlade. Zato mi danas mijenjamo ovu komisiju iz tog razloga. Hvala. I neću više.

Predsjedavajući:

Zahvaljujem uvaženom zastupniku Deviću. Odgovor na repliku uvaženi zastupnik Stojanović.

Poslanik/zastupnik Igor Stojanović:

Gospodine Dević vaš stav da u nečemu se kasni, je vaš subjektivan stav. Ja mislim da Kanton Sarajevo je kasnio 20 godina u smjeni kadrova koji su iz SDA bi li po 20 godina ali to je dio subjektivnosti i o tome ne trebamo diskutovati. Nema ovdje nikakve zamjene teza sa komisije. Činjenica je jedna da je nova većina došla sa predloženim kandidatima za Vladu, nakon kritika promijenjena su dva kandidata. I to je jedina činjenica unutar ove komisije. Sve drugo je zamjena vaša teza. I zato nemojte mi ovdje govoriti i spočitavati nego govorite vrlo jasno o činjenicama. Mijenjate članove koji su vas kritički upozorili o vašim prijedlozima iz Vlade. Danas ih mijenjate isključivo zbog toga i ni zbog čega drugog. I zašto ste ih na kraju krajeva promijenili, vi nemate obrazloženje pričate o radu komisije a zašto ste onda pristali. Ako je sve ovako kako vi govorite nema onda nikakve potrebe da promijenite dva kandidata u samo pet dana od vašeg prijedloga. Hvala.

Predsjedavajući:

Hvala uvaženi zastupniče Stojanović uvaženi zastupnik Dević replika, imate pravo još po jednu i to je to vas dvojica.

Poslanik/zastupnik Mahir Dević:

Samo rečenica. Četiri puta radi građana Ustavni sud FBiH poništio vaša tumačenja Poslovnika naše ni jedno. Znači četiri puta, odnosno tri puta i jednom se proglasio nenadležnim jer je usvojen prijedlog. Prema tome, nemojte vi nama o Poslovniku pričati to je stvar koju smo mi do sada dokazali da to poznajemo.

Predsjedavajući:

Prednost imaju repliku pa ja bih vas lijepo molio uvaženi zastupniče Čampara da pustimo uvaženu zastupnicu Bišćević-Tokić, džender politika. A povlači se. Uvaženi zastupnik Čampara replika, ispravka krivog navoda uvaženi Suljević.

Poslanik/zastupnik Samir Suljević

Morao sam reagovati na izlaganja kolege Mahira Devića. Ja ne znam da li ima problem da razluči šta je rješenje, šta je odluka, šta je mišljenje. U prvom navodu kaže da je Ustavni sud donio četiri presude. Prvo Ustavni sud nije donio četiri presude. Onda se govori o odlukama a ovdje se radi o Mišljenjima. Znači Ustavni sud nije donio ove odluke i mislim da kolega Mahir ovdje malo brka pojmove. Hvala.

Predsjedavajući:

Zahvaljujem uvaženom zastupniku. Poslovnička intervencija uvažena zastupnica Kerla.

Poslanik/zastupnik Bibija Kerla:

Ja ispred Kluba DF tražim 15 minuta pauze.

Predsjedavajući:

Pauza 15 minuta. Nastavak sjednice dozvolite. Na zahtjev DF ja moram iste sekunde dati pauzu do 30 minuta. Ukoliko se dogovorite pa da glasamo da je to pauza neka duža za ručak onda to treba da kažete. Pauza u trajanju od koliko vremena? Sat i deset minuta. Nastavak sjednice u 15,00 sati. Morate se izjasniti ko je za ovakav prijedlog pauze do 15,00 sati?

Pauza do 15,00 sati.

27 ZA, protiv 2 i suzdržan 1.

NASTAVAK NAKON PAUZE

Predsjedavajući:

Nastavljamo sjednicu Skupštine Kantona Sarajevo. Uvažena zastupnica Srna Bajramović Segmedina ima riječ, izvolite.

Poslanik/zastupnik Segmedina Srna Bajramović:

Zahvaljujem predsjedavajući. Pa evo nadam se da ću se sjetiti onoga što sam željela da kažem nakon svih replika, poslovničkih intervencija, ispravki krivih navoda. Dakle iako sam svjesna da kako su gotovo uvijek izmjene radnih tijela formalnost, danas imam potrebu da razjasnim neke stvari. Pojedinci iz vladajuće većine su negodovali i predstavljali opstrukcijom činjenicu da aktuelna komisija za izbor i imenovanje nije podržala kandidate za ministre. Za mene je to bilo jedino ispravno i konzistentno ponašanje jer je valjda normalno da glasanje na radnim tijelima i plenarnom zasjedanju zastupnika po istim tačkama bude identično. U protivnom dolazite u prostor da vas neko smatra možda podvojenom ličnošću. Bez obzira što je neko iz

žurbe smatrao kako je to čista formalnost. Kako to nije čista formalnost govori i činjenica kako je koalicija Petak 13 naknadnim hokejaškim izmjenama zamijenila dva imena u Vladi i time pokazala da ni sama ne podržava svoje prve prijedloge, a posljedično potvrdila ispravnost stava aktuelne većine u komisiji. Zbog toga je za sve najbolje, i to tvrdim od početka da prema poznatim demokratskim praksama nova parlamentarna većina preuzme rukovodstvo Skupštine, pa komisije i onda imenuje Vladu čime stvara pretpostavke za apsolutnu pokrivenost procedura u cilju realizacije vlastitog plana kojeg na žalost još nismo vidjeli ali ga očekujemo željno kao i sarajevska javnost. Zaključno, ove personalne izmjene u komisiji su očigledno bazirane na političkom i nacionalnom ključu kojem je jedini cilj imati većinu ta ko da se ne mogu složiti ni sa komentarom mog kolege Igora Stojanović kako izbacujete samo kritičare, jer bi vjerovatno izbacili svu opoziciju da vam to omogućava Poslovnik i nacionalna struktura klubova koji čine vlast. Evo, bilo je kratko.

Predsjedavajući.

Zahvaljujem uvažena zastupnice Srna Bajramović Segmedina.

Poslanik/zastupnik Amra Junuzović-Kaljić:

Hvala predsjedavajući. U suštini ja ću vrlo kratko obzirom da rasprava već dugo traje i dosta je toga je iznešeno. A ja sam htjela da postavim najjednostavnije pitanje. Zašto sam ja promijenjena iz komisije za imenovanje i administrativna pitanja. Mislim da sam svojim radom u toj komisiji jako doprinijela i da sam dobro radila. A evo ta promjena mi nekako govori drugačije, hvala vam lijepo.

Predsjedavajući.

Zahvaljujem uvaženoj zastupnici Junuzović-Kaljić.

Poslanik/zastupnik Damir Nikšić:

Hvala predsjedavajući. E ovako ja mislim da pitanje ovih komisija ja to ne gledam baš isključivo kao pitanje većine proste većine, i vlasti već više gledam kao pitanje klubova. I mislim da taj segment Skupštine treba da funkcioniše malo drugačije. Svi mi imamo svoje razne interpretacije ali dobro bi bilo uvažiti ovo. Ovo pitanje komisije kao pitanje klubova. Klub kojim predsjedavamo je najveći klub u ovoj Skupštini i to ne našom zaslugom već radi određenih smicalica i taktika u Kolegiju i dobro to je pravo velikih stranaka i velikih klubova pobjedničkih stranaka da se usitni pa da se onda preglasavaju na Kolegiju, to je neka taktika da objasnim gledaocima i javnosti bila. I to je odlična taktika, imate pravo na nju. Ali sada kada je tako kako jeste, znači sami ste sebe doveli u tu situaciju. Vaši klubovi su se usitnili na tri do četiri čovjeka, naš klub je pet. Nas ima pet, najveći. I ja kao predsjednik najvećeg kluba kanim iskoristiti tu činjenicu, i taj argumenti tu priliku i zahtijevati ovdje od svih vas da se uvažana doktorica Amra Junuzović Kaljić ostane u komisiji za izbor, imenovanja i administrativna pitanja Kantona Sarajevo. I ne samo to, već da ispunite sve ostale naše zahtjeve koje ste dobili. Ustvari ta će komisija ispunjavati kasnije sve ostale imenovati komisije i to kao najvećem klubu ove Skupštine. I sada ko vam je kriv što ste se doveli u tu situaciju da naš klub bude najveći a vi ste htjeli na ćupriji dobijete na mostu se izgubi. Ne može i jare i pare. Tako da sada trenutno kao predsjedavajući najvećeg kluba to zahtjeva. To sada neko može pitati ko je Damir Nikšić da to zahtjeva. Ako se neko pita recimo kolega Čampara ili neko drugi, pošto je jednom prilikom pitao u vezi Sarajevo gasa, a ja ću s ponosom da odgovorim predsjednik najvećeg kluba u ovoj sali. Znači ovdje imamo sve članove kluba, samo ne sjedimo zajedno. Tako da nas ne vidite zajedno i ne doživljavate tako kao najveći klub u ovoj sali. Strateški smo raspoređeni. Mi smo se infiltrirali. Ali kada bi se sjeli zajedno da ne zovem da ustanemo svi da vidite koliko nas to ima, da se ne prepadnete, mi smo se onako izgubili u masi, i možda nas zbog toga ne shvatate ozbiljno i uzimate nas

zdravo za gotovo. E sada rekao sam gotovo ali nije još gotovo. Naš klub neće glasati za prijedlog odluke, jer po njoj mi kao najveći klub zastupnika nemamo svog člana u najvažnijoj komisiji koja treba da odobrava i potvrđuje sve ostale pozicije. Smatramo da se takvim izborom čini velika nepravda prema najbrojnijem klubu i ne samo najvećem klubu i instituciju samostalnog zastupnika. Što je veoma nedemokratski čak je pomalkice i antidemokratski. I radi toga pozivam cijenjene kolege i kolegice zastupnike i zastupnice da glasaju protiv ove odluke, i da uvrste dr. AAmru Junuzović-Kaljić jer ako glasaju a ovu odluku danas, po mom mišljenju i mišljenju našeg kluba bit će to teška povreda demokratskih prava samostalnih zastupnika čiji je klub, ponavljam hoćemo li zajedno, najveći klub u ovoj Skupštini trenutno. E sada ako glasate za ovaj prijedlog, to ću smatrati terorom većine. Eto imam pravo da to smatram i proglasit ću terorom većine i nedemokratskim činom ove Skupštine zato vas molim ili da povučete ovaj prijedlog tj da s suzdržimo svi od glasanja tj da glasamo protiv ovog prijedloga sve dok se dr. Amra Junuzović Kaljić ne uvrsti na listu članova Komisije za izbor imenovanja i administrativna pitanja Kantona Sarajevo. Hvala vam.

Predsjedavajući.

Ispravka krivog navoda uvaženi zastupnik Čampara.

Poslanik/zastupnik Aljoša Čampara:

Zahvaljujem. Pa jedna mala ispravka krivog navoda gospodinu Nikšiću radi javnosti i radi gledatelja bitno je naglasiti da vi niste najveći klub zato što se se formirali neki drugi klubovi nego upravo zato što ste se vi pojedinci odvojili od vaših matičnih stranaka pa ste onda na osnovu toga formirali klub zastupnika, mislim da bi bilo pošteno reći kako je to išlo i kako je išlo ovo formiranje kluba koji je nastao od zastupnika koji su bili u SDP. Naša stranki, SBB i koliko ja znam još ovoj NL. To su stranke u kojima ste vi prije učestvovali a sada ste izašli iz tih stranaka iz klubova i formirali svoj nezavisni klub. Hvala.

Predsjedavajući:

Replika uvaženi zastupnik Nikšić pa Marjanović.

Poslanik/zastupnik Damir Nikšić.

Jesmo najveći upravo zbog toga što ste se vi usitnili jer da se niste usitnili bili bi veliki klub ali ne bi bili najveći. Vas je bilo deset, ovih je bilo sedam, osam ne znam koliko. I samo radi toga što ste se usitnili mi smo izbili na prvo mjesto, razumijete. Nismo mi krivi. Mi smo htjeli biti najveći ali ste nam vi pomogli. Hvala.

Poslanik/zastupnik Damir Marjanović:

replika ali uzet ću u obzir da možda ću pogriješiti jer nisam baš sabirao dobro glasove za jedan klub ali koliko sam mogao preliminarno da analiziram po broju preferencijalnih glasova ovaj klub od pet, trenutno u ovom momentu ima i najveći broj glasova. Tako da je postigao i najveći legitimitet na izborima bez obzira unutar ili izvan znači govorimo o ljudima koji su ostvarili veliki broj glasova. Odmah se ograđujem nisam prebrojao ovaj broj glasova gdje sjedi gospodin Konaković. Hvala.

Poslanik/zastupnik Bibija Kerla.

Ja ću vrlo kratko. Želim da se zahvalim Segmedini Srni na izuzetno konstruktivnom komentaru kao jedna od najiskusniji u Skupštini Kantona Sarajevo. Segmedina hvala ti na svemu ovome i smatram da je tvoj komentar na pravom mjestu. Hvala lijepo.

Predsjedavajući:

Ukoliko se više niko ne javlja za riječ zaključujem raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O IZMJENI ODLUKE O IMENOVANJU KOMISIJE ZA IZBOR I IMENOVANJA I ADMINISTRATIVNA PITANJA SKUPŠTINE KANTONA SARAJEVO.

ZA JE GLASALO 17 ZASTUPNIKA, PROTIV 12, SUZDRŽAN 4.

Dević sumnju u glasanje izražava. Sekretaru molim vas.

Sekretar po ovlaštenju Almira Kulovac Šetkić:

1. Aljović Hamed ZA
2. Bešlija Vildana SUZDRŽANA
3. Bišćević-Tokić Jasmina ZA
4. Čampara Aljoša ZA
5. Čelik Mirza ZA
6. Ćosović-Hajdarević Samra ZA
7. Delalić Sabahudin ZA
8. Dević Mahir ZA
9. Dizdarević Neira SUZDRŽANA
10. Duraković Jasna PROTIV
11. Handžić Vibor SUZDRŽAN
12. Hasagić Amra ZA
13. Hasanović Senad ZA
14. Hodžić Admela ZA
15. Jakupović Vedran PROTIV
16. Junuzović-Kaljić Amra PROTIV
17. Kerla Bibija ZA
18. Konaković Elmedin PROTIV
19. Krstić Danijela SUZDRŽANA
20. Marić Zvonko ZA
21. Marjanović Damir PROTIV
22. Mekić Amel PROTIV
23. Memić Arijana PROTIV
24. Milavica Sead ZA
25. Nikšić Damir PROTIV
26. Okerić Elvedin PROTIV
27. Pecikoza Fahrudin ZA
28. Pleho Haris ZA
29. Poturak Dževad ZA
30. Srna- Bajramović Segmedina PROTIV
31. Stojanović Igor PROTIV
32. Suljević Samir PROTIV
33. Šahman Bilsena ZA
34. Viteškić Smiljana ZA
35. Vreto Elvis OPRAVDANO ODSUTAN

Predsjedavajući:

Za je glasalo 18 zastupnika, protiv 12, suzdržanih 4.

KONSTATUJEM DA JE SKUPŠTINA DONIJELA OVU ODLUKU.

Prelazimo na četvrtu tačku dnevnog reda:

AD – 4.

PRIJEDLOG ODLUKE O RAZRJEŠENJU DUŽNOSTI ZAMJENIKA PRAVOBRANIOCA PRAVOBRANILAŠTVA KANTONA SARAJEVO

Materijal ste dobili uz poziv za sjednicu. Molim predstavnika Predlagača da podnese uvodne napomene ukoliko ima potrebe. Ima li potrebe? Nema. Uvaženi zastupnik Konaković.

Poslanik/zastupnik Elmedin Konaković:
Ko je predstavnik predlagača sada?

Predsjedavajući:

Predstavnik predlagača je Komisija za izbor i imenovanje i administrativna pitanja.

Poslanik/zastupnik Elmedin Konaković:
Hvala kolega Čelik.

Predsjedavajući:

Ima li pitanja? Imamo Deviću, Konakoviću jeste li za pitanja? Ja bih vas lijepo molio da se isključite. Otvaram raspravu. Obzirom da se niko ne javlja zaključujem raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O RAZRJEŠENJU DUŽNOSTI ZAMJENIKA PRAVOBRANIOCA PRAVOBRANILAŠTVA KANTONA SARAJEVO.

Molim rezultate.

ZA JE GLASALO 34, PROTIV I SUZDRŽANIH NIJE BILO.

KONSTATUJEM DA JE SKUPŠTINA DONIJELA OVU ODLUKU.

Tačka pet:

AD – 5.

PRIJEDLOG ODLUKE O IZMJENI POSLOVNIKA SKUPŠTINE KANTONA SARAJEVO

Materijal ste dobili u dopunskom materijalu. Molim predstavnika Predlagača da podnese uvodne napomene, zastupnik Zvonko Marić kao predlagač izmjena. Ima li potrebe? Nema potrebe. Da li predstavnici radnih tijela žele riječ? Ima li pitanja? Otvaram raspravu. Zastupnik Konaković Elmedin izvolite.

Poslanik/zastupnik Elmedin Konaković:

Mma neću dugo samo jedan kratki komentar. Dakle ja se slažem s prijedlogom. Neću govoriti o proceduri načina izmjene Poslovnika ali državni službenik u Kolegiju ne bi trebao biti opterećen ovim našim političkim odnosima. A ima jedna nelogičnost koju bi da prokomentarišem. Vi ćete sada dovesti sekretara po svojoj mjeri i ukinut ćete mu pravo glasa, a nama ćete omogućiti da odmah kada skupimo većinu, a to neće trajati dugo, iskoristimo ovu poslovničku odredbu i preuzmemo većinu u Kolegiju. Tako da smo mi za ovakav prijedlog i zahvaljujemo se predlagaču.

Predsjedavajući:

Zahvaljujem uvaženom zastupniče Konaković.

Poslanik/zastupnik Samir Suljević:

Hvala predsjedavajući. Ja ne bih se referirao na ovo ali postavljam pitanje ako je 14. još na 83. sjednici Skupština Kantona utvrdila javnu raspravu o Nacrtu Poslovnika i donijela zaključak da se provede javna rasprava, javna rasprava završena, zašto se ne ide u kompletno stavljanje na dnevni red Poslovnika gdje je i ova tačka obuhvaćena, nego se parcijalno ulazi u Poslovnik. Ja smatram da ovo nije u redu iz prostog jednog razloga, referirao bi se na ovo maloprije što je kolega Nikšić rekao, znači članom 22 novog Poslovnika je predviđeno da jedna politička partija može imati jedan klub. E sada mi smo došli u situaciju da više se ne zna ko koliko ima klubova, ko iz koje političke stranke je predsjednik drugog kluba i očigledno da mi Poslovnik uzimamo kako kome odgovara. Po meni bolja je varijanta bila da se s Poslovnikom da u narednom mjesecu ide u proceduru Kolegij i da ide na Skupštinu a se usvoji kompletan novi Poslovnik ali očigledno je da novoj političkoj većini ove stvari ne odgovaraju jer onda bi se išlo s članom 22 koji kaže da jedna politička partija može imati jedan klub, ne bi bilo SDA 1, SDA 2, SDA 3, nego bi bio samo SDA: i po tom rezonu ne bi se imala većina u Kolegiju. Zato vas molim nemojte parcijalno ulaziti u određena rješenja a ja ovo smatram da je samo dnevno politička igra. Hvala.

Poslanik/zastupnik Damir Nikšić:

Hvala predsjedavajući. I kada meni kažu da ja galamim. Samir kada se javi odzvanja sve. Žao mi je što nećemo biti, što nismo čuli predlagачa i to. Ja bih pomenuo da je na Kolegiju jedan od argumenata, zapravo sam prijedlog otvoren na taj način da se radilo o pritiscima na sekretarku Šetkić i da je zbog tih pritisaka, galama i toga svega, bilo je teško obnašati tu dužnost, tako da neko je vršio pritisak da glasa. Niko nije vršio pritisak da ne glasa. I tu je neki problem oko pritisaka bio. Ja sam tada na Kolegiju pitao: dobro, evo ovaj će prijedlog i ova izmjena Poslovnika nekako sačuvati sekretarku Šetkić od pritisaka i onda sam pomenuo pritiske na ostale profesionalne radnike i radnice, uposlenike i uposlenice Skupštine i službi Skupštine. Šta je sa pritiscima koji se na njih vršili. I tada sam vam na Kolegiju obećao da ću vas sviju prozvati ovdje zbog tih pritisaka. I predsjedavajućeg Čelika, na osnovu onoga što sam čuo od uposlenika i uposlenica ovoga, a isto tako uvaženu zastupnicu Bibiju Kerlu, Admelu Hodžić, gospođu Šahman. I ko je još bio, Dević, jeste. Javi se Deviću sam. Znaš da se na tebe misli a ušutio si se.

Predsjedavajući:

Uvaženi zastupniče Nikšiću, ja bih vas lijepo molio da se vratite na tačku dnevnog reda. Način na koji govorite zaista nije u skladu sa Poslovnikom i ne dotiče ove tačke dnevnog reda. Ako ćete da kažete imate Etičku komisiju, imate Sindikat. Svi uposlenici koji su bili ili zlostavljani ili s vaše ili s naše strane, govorim personalno o vama i o meni, imaju pravo da podnesu i nadležnim institucijama prijavu pa neka istražitelji kažu da li je bilo zloupotrebe položaja i ovlasti ili sa jedne ili sa druge strane. Zaista vas molim da se vratite na tačku dnevnog reda i da razgovaramo o tački koja je trenutno na dnevnom redu. Hvala vam.

Poslanik/zastupnik Damir Nikšić:

Ja se referiram na uvod predlagачa koji je bio uvodni kako nam je došlo na ovome i radi toga. Dobro neću dalje ići. Samo sam htio da iskoristim ovu priliku, evo da se ja prvi javno ispričam što sam povikao par puta, ako sam prepao ostale uposlenike i uposlenice. Ne vas zastupnike. Vama sam uputio vikanje. Ali sam slučajno prepao uposlenike i uposlenice Skupštine i službi da im se ja ispričavam. I pozvao bih isto vas da se svi javno ispričate za mobing koji ste vrši protekla dva mjeseca. Hvala.

Predsjedavajući:
Zahvaljujem uvaženi zastupniče.

Poslanik/zastupnik Segmedina Srna Bajramović:

Hvala. Pa ove izmjene Poslovnika koje smo dobili a u kojima se isključuje sekretar kao državi službenik iz prava glasanja na Kolegiju, jesu legitimne ali su bojim se nastavak brutalne prostitucije Poslovnika i procedura koje imamo u cilju ovladavanja kolegijem. Iako sam svjesna kako se u ovom slučaju radi o politički pragmatičnom potezu koji treba rasteretiti sekretarku stresa od egzaltiranja politike u namjeri preuzimanja svih poluga vlasti, smatram kako se radi o potpuno pogrešnom potezu koji neutralizira možda jedini glas razuma koji treba da ukroti politiku koja vrlo često zna podivljati u procedurama. Na zadnjoj sjednici Skupštine kada smo raspravljali o smjeni Vlade, govorila sam kako je u demokratiji matematika važna. Ali ako matematiku ne prati logika onda dobijete cirkus od procedura kakav danas gledamo ili kakav smo gledali zadnjih nekoliko mjeseci. Dakle svjedoci smo da politika vrlo često zaboravi kako joj je javni interes najveći prioritet te kao takva često zaluta u sferu kontaminacije privatnog i poslovnog izvan javnog, što samo po sebi ukazuje koliko je važno da sekretar u liku i djelu državnog službenika bude čuvar procedura javnog interesa. Bojim se da su ove izmjene vrh ledenog brijega nakon ranijeg cirkusa od cijepanja klubova i o tome se danas govorilo i njihovog novo numeričkog slijeda sa istim imenima u cilju ostvarivanja dodatnog glasa i većine u Kolegiju. Kako smo krenuli, bojim se da ćemo sjednice Kolegija morati organizovati u skupštinskoj sali, a brojnost istog nam je blizu foruma, otprilike za skupštinsko zasjedanje pa Kolegij sam po sebi postaje i apsurdan u smislu svoje uloge u nadležnosti. Dakle kreiramo atmosferu u ko joj možemo očekivati da nekome možda može pasti na pamet da ukinemo i Skupštinu jer mu usporava političke ambicije i što će naravno ponovno pokušati prodati kao interes građana, kao već dokazani folklor prateći folklor poteza politike. Iskreno smatram kako je vrijeme da se svi zajedno uozbiljimo i zaustavimo ovo divljanje partiokratije koja svojim ponašanjem drobi i preostale mrvice povjerenja građana u ovaj zakonodavni sistem. Toliko zahvaljujem.

Dopredsjedavajući Vibor Handžić:

Zahvaljujem predsjedavajući- evo nisam stigao da zaželim dobar dan svima prilikom prvog javljanja. To ovaj put činim. Meni se jako sviđa ovaj novi način funkcionisanja Skupštine gdje je većina 18 ljudi, napokon svi dolaze na posao, svi sjede cijelu sjednicu na svojim radnim mjestima kako bi i trebalo. Što se tiče ove tačke dnevnog reda iznijet ću samo stav ispred kluba zastupnika Naše stranke, ono što sam rekao i na Kolegiju. Suštinski sa ovom poslovničkom izmjenom, ni ja niti moj Klub nemamo ništa protiv, smatramo da sekretar kao profesionalac ne treba da učestvuje u glasanju o političkim pitanjima gdje sjede na tijelu na kojem sjede predstavnici političkih partija. To nije ni do sada radila aktualna sekretarka. Međutim član sam radne grupe koja je na pet, šest, radnih sastanaka priprema nacrt Poslovnika, bila ovdje rasprava na Skupštini, prošla javna rasprava, ima tamo super, s jedili su u toj radnoj grupi predstavnici svake političke partije, ima super izmjena koje također omogućavaju bolju prohodnost rada na Skupštini, rasterećuju rad Kolegija. Ostavljaju zastupnicima više dana za pripremu za materijale i podnošenje amandmana itd. I onda iz kompletnog tog materijala koji ne znam koliko već traje njegova priprema, mi izvadimo jednu izmjenom za koju tvrdimo da će nam olakšati rad u nečemu a postoji još masa drugih izmjena koje će također olakšati rad i Kolegija i Skupštine Kantona Sarajevo. Ja mislim da su razlozi neki potpuno drugi, ne smijem tačno i ne znam, neću to tvrditi, zbog tog izdvajanja jedne ove sitne izmjene, mi nećemo podržati ovakav način izmjene Poslovnika. Zahvaljujem.

Poslanik/zastupnik Zvonko Marić:

Ne znam da li ima potrebe zaista da se javljam kao predlagač. Znae kako se dešava, šutiš a već su te pogrešno shvatili. Ja ni riječi nisam rekao ovdje ali sam doživio razna tumačenja i u skladu s tim jer smatram da ne dozvoliti mi da kažem kao predlagač zbog čega to činim, a i ja sam bio član te komisije za izradu novog Poslovnika, izmjene i dopune, ako se sjećate, i to je bilo odavno, mnogi su zaboravili na tako nešto, zašto nije u proceduru kasnije ušlo, neću o tim stvarima da govorim, a također imao bih i krivih navoda, ali eto kažem krivo sam protumačen i smatram ih vrlo neozbiljnim. To sam rekao i na sjednici Kolegija, i na takve stvari ne odgovaram u principu. I ono što posebno hoću da istaknem, žao mi je što nisu dozvolili da ja nešto kažem ali eto oni su kazali u svoje ime nešto drugo, prokomentirali i smatram da je to pomalo licemjerno ne dozvoliti predlagaču da nešto kažem. Tamo sam i rekao na sjednici Kolegija, da imam više motiva jer sam i sam oklevetan vezano za to, i to na društvenim mrežama, ali iz pristojnosti i nekog dostojanstva neću reći za tu brutalnu laž koja je meni pripisana i to je bio moj lični motiv i neću o tome da govorim. Hvala vam.

Predsjedavajući:

Replika uvaženi zastupnik Nikšić. Krivi navod.

Poslanik/zastupnik Damir Nikšić:

Krivi navod, ja ne znam jesam li ja pogrešno shvatio ko nije dozvolio, ja nisam dozvolio da se predlagač ili svi nismo dozvolili? Ko nije dozvolio? Mislim predlagač je mogao da se obrati, jel tako? Mislim ne razumijem čemu se? Ko nije dozvolio da se obrati predlagač sada ovdje?

Predsjedavajući:

Mi smo tako odlučili, zajedno svi.

Poslanik/zastupnik Damir Nikšić:

Pa eto, kome sada, sada sam ja kriv nekome iz opozicije, ko? Znači sada gospodin Marić nama svima zamjerio, odnosno mi smo se njemu zamjerali. Ne razumijem šta se desilo.

Predsjedavajući:

Ja bih vas lijepo molio da zaključimo ukoliko nema niko da je prijavljen za raspravu ja zaključujem raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O IZMJENI POSLOVNIKA SKUPŠTINE KANTONA SARAJEVO.

Otvaram glasanje. Rezultate molim.

ZA JE GLASALO 19 zastupnika, PROTIV 12, SUZDRŽANIH 2.

KONSTATUJEM DA JE SKUPŠTINA DONIJELA OVU ODLUKU.

Obzirom da smo iscrpili sve tačke dnevnog reda, ja zaključujem 21. Radnu sjednicu Skupštine Kantona Sarajevo. Želim vam ugodan rad i vidimo se trećeg, kada je 22. Radna sjednica. Hvala.